

皇明大政紀

皇明大政紀卷之二十五

臣茶陵譚希思謹輯

金谿閔師孔謹校

金陵博古堂謹刊

穆宗莊皇帝。世宗第三子。孝恪皇太后杜氏生也。在位六年。壽三十六。

嘉靖四十五年十二月丁酉朔。

壬子。上卽皇帝位。大赦天下。以明年爲隆慶元年。

釋戶部主事海瑞于獄中。

瑞先以諫玄修事。被杖下獄論死。上在潛邸。素聞其

剴直。故亟釋之。

命以元年正月二日御門視事。

命欽天監造隆慶元年大統曆通行天下。

丙辰行大祫禮于太廟。

隆慶元年丁卯春正月丁巳朔。

戊午上御宣治門視事。

命錄用先朝建言得罪諸臣。

吏部奏通政使樊深都給事中丘橈楊思忠尹相魏良弼李用敬左給事中陳瓚給事中吳時來周怡沈束顏存仁趙軌張選袁世榮御史何維栢趙錦張登高黃正色方新張櫟凌儒申仲主時舉馮恩郎中徐學詩周冕主事張翀董傳策劉世龍唐樞寺正母德純等凡三十

三人宜遵遺詔錄用。報可。是日遂除璫時來于吏科。乾  
禮科。世榮。兵科。儒登。高。浙江道。檳湖廣道。錦維。栢。河南  
道。仲。山東道。時舉。山西道。翀。傳策。刑部。俱原職。餘皆以  
次推用。其年七十以上。例得引年者。陞秩致仕。如尹相  
良弼。俱太常少卿。張選。通政司叅議。馮恩。大理寺丞。  
母德純。劉世隆。俱尚寶少卿。

命恤錄諸臣以建言死者。

吏部又言諸臣中建言死者。其等有三。戮死者爲一等。  
應復職贈蔭。厚加諭祭。若員外郎楊繼盛。左中允郭希  
顏。錦衣衛經歷沈鍊。給事中楊允繩。凡四人。其次廷杖  
死者。應復職贈蔭。若太僕寺卿楊最。編修上思。給事中



薛宗鎧何先裕裴紹張原御史浦鉉曾翀葉經主事周  
天佐忤倫臧應奎殷承叙凡十三人。又次擊獄戍邊。斥  
死牖下者。應復職贈官。若左侍唐胄都御史李璋學士  
豐熙修撰楊慎編修楊名檢討王元正贊善羅洪先大  
理寺左少卿徐文華都給事中張翀張侃劉濟劉琦御  
史馬錄程啟元盧瓊陳讓桑喬包節王宗茂余翔方一  
桂員外劉魁郎中余寬黃待顯陶滋相世芳主與齡金  
事張鏞凡二十八人。至如尚書熊浹諫止仙亭。御史楊  
爵彈擊權倖。二臣無罪。止黜。然其忠義風節。爲世共仰。  
又當與杖死者一體卹錄。上從其議。于是贈浹少保。  
仍賜祭九壇。諡恭肅。繼威希顏鍊允繩各賜祭一壇。又

贈繼盛爲光祿少卿。謚忠愍。蔭其子應尾爲國子生。希顏子禹臣。仵瑜子賓俱錄爲國子生。明年二月。又以御史郝杰之奏。詔建繼盛祠于保定府。賜名旌忠。令有司春秋致祭。

掌詹事府事吏部左侍郎陳以勤上謹始十事。

一曰定志。二曰保位。三曰畏天。四曰法祖。五曰愛民。六曰崇儉。七曰攬權。八曰用人。九曰接下。十曰聽言。

丙寅。上始釋衰服。素翼善冠。麻布袍。素腰絰。仍御宣治門視事。禮部遵 詔會議。郊社諸典禮及祔塋祔享之制。

一郊祀之禮。臣等議以爲天地分祀。昉于周禮。圓丘方

丘之文自漢以來歷代分合不常諸儒議論不一我太祖定鼎之初與一時儒臣議酌考訂首建分祀之禮其後因感齋居陰雨始改合祀至我皇考仍建四郊如洪武初年之制蓋太祖始分而後合皇考改合而爲分然皇考之更制卽太祖之初制也分祀已久似難紛更宜照例南北二郊于冬夏至日恭請聖駕親詣致祭仍奉太祖高皇帝議至于西苑帝社稷之祭不無嫌于煩數臣等竊以爲止宜照舊奉大社大稷之祭其帝社帝稷宜罷一陵塋廟祔之禮我國家自宣宗以前陵寢合塋皆止一后至裕陵則二后同祔塋茂陵則三后同祔塋若太廟

祔享則推一帝一后。又后准元配始得升祔。恭惟孝  
潔皇后爲皇后元配。禮應合葬。永陵祔享太廟。  
先年神主回京時。本部曾請祔享。以其時未有本室暫  
祔。奉慈殿側以俟。孝烈皇后雖曾正位中宮。然非  
元配。今先已祔廟。又奉孝潔皇后同祔。則配后並  
配非。祖宗舊制若因。孝烈皇后先祔而使孝潔  
皇后不得升祔。則舍元配而祔繼配。亦非。祖宗舊制  
况孝潔皇后宜祔之禮。皇考先年已有欽依。近日  
復有遺命。臣等竊以爲皇考升祔太廟之時。宜  
請孝潔皇后祔享而奉。孝烈皇后于別所。仍于  
皇考發引之先遷奉。孝潔皇后梓宮于永陵與

聖母梓宮同日祔葬。孝烈皇后既以祔葬似當以次  
列祔其 二后尊諡乞 敕臣等撰擬議文奏進薦上  
冊寶庶名分正而典禮全矣。上以禮官會議允當。  
命如議行之。

命修大內 神霄殿以祀 孝恪皇太后恭上 尊號。

加諡元配李氏爲孝懿皇后尋定 孝恪太后享祭俱  
膳儀以 孝懿后祔其歲五享及薦新忌辰行祭悉准  
孝穆太后制日膳如 太廟 奉先殿儀又諡裕世子  
爲憲懷太子藍田王爲靖悼王追封長女爲蓬萊宮主  
次女爲太和宮主

禁民間放燈。

吏部奏起用原任南京禮部尚書葛守禮等官。戶部右侍郎趙貞吉。兵部右侍郎郭宗皋。都察院副都御史林雲同。右僉都御史曹邦輔。布政鍾卿。副使曹金。金立敬。僉事謝廷荏等俱從之。

復除吏科給事中周怡。禮科給事中沈東。原職。

禮部請立皇后太子。

上曰。立后事可行。皇子尚幼。且先賜名。徐議冊立。

罷西苑兼督部臣。

先是。大行皇帝于西苑隙地。種植麥穀。命總督倉場戶部侍郎同司禮監督理農事。收其子粒。貯恒裕倉。以供大祭。染威。至是。禮部以禁地農作。出入非便宜。止。

令該監督理。少存重農省艱之意。其戶侍督農舊銜宜省從之。

逮方士王金等下獄論死。

初金以修煉。竄緣真人陶仲文子世恩。希求恩澤。乃偽造五色靈龜靈芝。以爲天降瑞徵。又與世恩及陶倣劉文彬申世文高守中偽造諸品僞方。養老新書。七元天禽護國兵策。及以金石藥進御。倣得遷太醫院使。世恩太常寺卿。金太醫院御醫。文彬太常寺博士。至是以遺詔逮鞠。皆伏法。

戶部尚書高耀等各以考察自陳。

得旨高儀等供職。耀致仕。吳三樂趙鏜改用。

黜翰林院侍讀學士王大任姜儆。

刑科都給事中徐公遴言二人前以御史訪求法秘躡致清華。今方士劉文彬等已正法。二人不宜追罪。吏部覆奏。大任等原奉旨訪進法士。似無希覲。但巡按時。甚有物議。宜黜得旨。革職閒住。

革工部尚書徐杲職。

杲以官匠修建。歷陞前職。至是以考察自陳。下吏部議。都給事中上元春等劾其以匠役官正卿。子文燦傳陞錦衣衛指揮世襲。皆濫名器。壞政體。並宜黜。吏部覆奏。從之。未幾太監李芳發其修蘆溝橋侵銀事。逮付法司。追贓發遣。



原任刑部侍郎鄢懋卿有罪戍邊。

初懋卿與大理卿荆案皆諂附嚴世蕃。奸賊狼藉嘗以巡鹽都御史徧歷郡縣所至騷擾及橫索有司饋遺無筭貪黷恣肆士夫側目。世蕃敗有司籍其家嘗寄案數萬金。事頗泄懋卿復給取案金二萬案抵罪詞連懋卿竟坐克軍。

詔奪故真人邵元節陶仲文官爵及誥命革道官金子剛等太常高士職號。

毀籍仲文墓碑坊碑田宅并收中剛及陶世恩玉印五牙印一銀印一銅印十。

命徹西苑內大高玄等殿圓明等閣玉熙等宮。

諸亭臺扁額各建齋醮宮殿初議盡毀禮部惜其材費請止去扁從之。

己卯萬壽聖節免百官賀。

以皇考梓宮在殯也免各王府及天下諸司進表慶賀。

黜吏科都給事中胡應嘉爲民尋以原職調外任。

初應嘉論大學士高拱于先朝拱頗銜之至是應嘉劾吏部尚書楊博曲庇鄉里考察不公以私憤謫給事鄭欽御史胡維新大學士徐階郭朴與拱謂應嘉黨護同官挾私妄奏首犯禁例擬旨黜之臺諫諸人疑出拱意謂拱修故怨脅階黜應嘉兵科給事中歐陽一敬因

論救應嘉語侵拱章下所司給事辛自修御史陳聯芳等交章論救階奪于衆論亦自悔乃改擬應嘉調用而拱又疑一敬之疏階主之嫌隙從此開矣然應嘉爲人傾險好訐士論亦薄之。

陞翰林院侍讀學士張居正爲禮部右侍郎兼學士

陞兵部主事海瑞爲尚寶司丞。

陞司經局洗馬兼翰林院侍讀殷士儋爲學士掌院事。命科道官王治王好問查盤內府各監局錢糧。

已而太監崔敏等奏請免查戶給張憲臣劾之得旨

詔書所載自嘉靖四十一年始備開收支見在之數與科道官查理未載者不得槩查敏等勿論至六月治等

上清查數，因劾內官翟廷玉、馬尹等乾沒之罪，詔屬司禮監治罪。

開廣秦溝以通運道。

先是河決沛縣，議者請修復運河故道。乃勘議新集郭貫樓等處上源已而總理尚書朱衡言：古之治河，惟欲避害。今之治河，又欲資其利。故河流出境山之北，則閘河淤；出徐州以南，則二洪涸。惟出自境山，至徐州小浮橋四十餘里間，乃兩利而無害。自黃河橫流，碭山郭貫樓支河皆已淤塞，改從華山，分爲南北二支：南出秦溝，正在境山以南五里許，此誠運河之利也；惟北出沛縣西，及飛雲橋迤瀝魚臺爲患，甚大。聖慈不忍沛縣魚臺

之民橫罹水災拳拳欲放故道臣等仰體聖心亦有  
勘議上源之請但考之地形叅之輿論其不可者有五  
自新集至兩河口皆平原高阜無尺寸故道可因卽欲  
濬深無異穿井郭貫樓至龍溝一帶頗有河形又係新  
淤無可駐足其不可一也黃河所經鮮不爲患由新集  
則商虞夏邑受之由郭貫樓則蕭碭受之今欲改復故  
道則魚沛之禍復移蕭碭其不可二也黃河西注華山  
勢若建瓴又無涯涘欲從中鑿渠挽水南向必當築壩  
爲力甚難其不可三也役夫三十三萬曠日持久勞民  
于旣疲之餘微功于難必之池騷動三省其不可四也  
大役踵興工費以數百萬計匱乏之後措置無策一有

不繼前功盡隳其不可五也臣以爲上源之議可罷惟  
開廣秦溝使下流通行修築南長堤以防奔潰可以甦  
魚沛昏墊之民工部請從衡議上曰可乃鑿舊渠深  
廣之引鮎魚諸泉薛沙諸河其中注壩三河口疏舊河  
築馬家橋堤道之出飛雲橋者使盡入秦溝自留城至  
赤龍潭又五十三里凡爲閘八減水閘二十爲壩十有  
二爲堤三萬五千二百八十一丈有奇石堤三十里已  
而鑿王家口導薛河入赤山湖鑿黃南導沙河入獨山  
湖戶爲支河八旱則資以濟清潦則洩之昭陽湖由是  
運道盡通河工成衡又議黃河上有曹縣直抵豐縣堤  
界新河自南陽起至宋家口可屬之山東驛傳道自宋

家口而南。及黃河自豐縣堤界而南。可屬之徐州兵備道。又于曹縣上下。築縷水壩。修掃臺。以防秋水衝決之患。其工費于兩淮工本銀。及山東河南料價支給。皆從之。于是叙治河工。加衛太子少保。進俸一級。

八月。工科左給事中吳時來。論治河未審者三。

其略曰。黃河運河故道難復。無論已。乃今新河以三難稱者。豈不以馬家橋易淺沙。易淤。薛河易衝爲患哉。臣以爲此患在委耳。源之不通。委將安屬。故治源者宜急也。夫新河與青原山至近也。而東兗以南。費嶧鄒滕之水注焉。以一堤而捍羣流。又當大山瀉下之勢。與素號瀦水之區。能保其不潰乎。故疏濬分殺之謀。宜豫也。夏

村迤邐數十里地勢居高必導水于薛河非開支河引薛河上流以分派其及三河口鮎魚泉諸地鑿口築堤益以啟閉之間能免衝決淤塞之虞乎故畜洩之計宜慎也願以河渠事命憲臣與藩臬之佐各一人專之罷濟沽南旺部臣之分理者上然其言令朱衡計處以聞南科張應治等又言近日三河口之決以新渠地高不能受汶泗滕薛諸水故一遇霖雨至于潰溢而尚書衡故多大言昔旣弄彼三沽而爲大河波及之區今又穴此一溝而萃全兗合流之水咎有所歸宜加罰治得旨降衡俸一級仍令悉心經理以圖後效於是衡復上議言河固悍難暴泄然使不直境山而北出將一聽沙



淤之所爲卽出徐州南而二洪益壯亟爲敗今素出秦溝直境山南五里所強兼受數河之任猶爲有束隘而河流得益駛疾卽夏秋水漲盛極反亦不能出新河西堤外而昭陽湖受之水得遊蕩休焉獨何言爲壑也今欲開新河起新集至兩河口無論漫無河形者二百五十餘里創作深廣難卽有河形如郭貫樓至龍溝滅未久稱易塞者亦已盡淤先臣所謂撮沙如聚米挑淤如畫脂者也且河之所舍誰能強之不如因河所欲注開之于東邵之上別開支河歷東倉橋以達百中橋鑿麥裏溝諸處爲渠使水入赤山湖由之以歸呂孟湖下景山而去至沙河又築壩于支河之下令水由之以出鮎魚

泉而于泉之對河開塘築堤以納其流而殺其勢因言  
陽莊南陽佃戶屯留城諸閘或宜改建或宜修理俱不  
可已之功而有司多不得人如徐州守鄒臣督建馬家  
橋閘旋就傾圯宜重懲之上從其言下鄒臣巡按御  
史提問且誠治河官實心幹理毋蹈前轍而都給事中  
馮成能又言新河可慮者三一自南陽而下至鮎魚口  
與三河口地形俱高水以平流積滯之故漫溢四野致  
奪樹藝之地又諸閘半就淹沒而長堤崩潰未已此上  
流之患可慮也二三河匯方流以西注既湍悍難制而  
其下達新河猶高屋建瓴衝擊彌甚故泥沙填壅之區  
澇則懼衝旱則懼淺此中流之患可慮也一夏鎮以南

諸閘水勢高下相懸幾及千丈。啟閉之節。畜洩爲難。此  
下流之患可慮也。以上三患皆由三河上下地勢居高  
復平行。雖目前告成。宜逆爲未然之備。上命以其疏  
示衡。令熟計。衡執前議。合決河深川之文。而增卑培薄。  
於是新河就。而西堤亦成。三年四月。總理河道翁大立  
又言新河勝舊河有五利。地形稍仰。黃水南衡。一也。津  
泉安流。無事隄防。二也。舊河陡峻。今皆無之。三也。泉地  
旣虛。黍稷可藝。四也。舟楫利涉。不煩牽挽。五也。顧道路  
之言。或稱未便者。以魚臺。滕沛。沮洳成湖。谷亭沽頭市  
廬失利。乃倡浮言以撓國是耳。臣請以一得之慮。孰陳  
于前。夫漕河故資泉水。而地形東西高下。非有湖爲之

積滯則涸故漕以東皆有水櫃非有湖爲之宣洩則潰  
故漕以西皆有水壑此先臣宋禮之訃畫蓋殫悉獨到  
者今新河實師其意遇黃流逆奔則以昭陽湖爲散衍  
之區遇山水東突則以南陽湖爲滯蓄之地慮不可謂  
不周矣然水有歸壑隄始無虞宜大興人卒繇回回墓  
一帶開通以達于秦溝令谷亭湖陵之水皆入昭陽湖  
又引昭陽湖水沿秦溝以出留城其湖池退灘者盡上  
腴之田按之可得千頃令民得種藝其中計畝出賦以  
供河渠之費計無便於此者 上從之

二月從遼東巡按李叔和議定總兵四時駐劄

叔和言遼東一鎮三百隣虞而以河之東西爲界春夏

秋宜備河西冬河水晚合宜備河東總兵官爲全鎮保障當審緩急策應今乃坐鎮河西而以河東委副將夫虜無多寡而兵有強弱今一月之間三犯河東坐視其虜掠不爲之所是秦人之視越也且總兵部下驍騎皆所選河東精銳之卒豈專爲河西計哉臣謂總兵宜以隆冬之時移鎮遼陽以援海州瀋陽水鮮回廣寧以防土蠻庶東西皆有備部覆奏從之

贈故刑部尚書鄭曉爲太子少保諡端簡

賜祭二壇遣官造塋復以巡撫鳳陽時禦倭功蔭其子履準爲國子生

賜諡原任兵部尚書翁萬達爲襄敏吏侍董圯爲文簡兵

侍陶諧爲莊敏。

冊妃陳氏爲皇后。

以登極加恩提調講讀及侍從藩邸諸臣。

陞大學士徐階子英爲尚寶少卿。加大學士李春芳郭朴俱少保。舊講官大學士高拱爲少保兼太子太保。武英殿大學士吏部左侍郎掌詹事府事陳以勤爲禮部尚書兼文淵閣大學士。禮部右侍郎張居正爲吏部左侍郎兼東閣大學士俱內閣辦事。翰林院侍講學士殷士儋爲禮部右侍郎兼翰林院學士其餘王凝尹樂舜劉奮庸吳自峒周繼藩吳自成等陞陟有差。階等具疏辭免恩命。上各加褒勉不允辭。

原任四川按察司僉事趙祖鵬爲民。

鵬初爲編修。結姻權貴。頗爲士論所鄙。及罷官。族人趙馴訐奏。祖鵬作詩謗訕。自以宋代子孫。僭擬踰等。及侵奪寺宇田地。諸不法事。詔徵下獄。論死。至是刑部奏以語言妄誕。坐重辟。不無可矜。遂釋之。

### 詔議錢法

戶部奏錢法之弊有三。嘉靖初。稅課皆徵錢。俸給貿易。皆資錢。其後。舖戶濫收惡錢。以充俸鈔。及稅課專徵銀。又民間止用制錢。不用古錢。於是錢法始壅。一也。又法令疏闊。私鑄者多。真僞混淆。則煩揀擇。揀擇太精。則碍行使。二也。又無知小民。聽信訛言。轉相搖惑。謂制錢且

罷。遂格不行。三也。宜禁偽錢及濫惡。其本朝制錢并先代舊錢俱宜聽民間兼行。稅課房號行戶等銀俱令收錢。如偽造及阻撓低昂價值者重罪之。詔從其議。

加恩藩邸侍衛直宿報事廠衛官校。

朱希孝孫鈺張大用李永譚宏白一清各蔭陞有差。

加恩內臣

司禮太監黃錦加祿二十四石蔭一弟姪爲錦衣指揮僉事。從龍太監梁鈿李芳加祿二十六石。各蔭一弟姪爲錦衣指揮同知。王本馮保等各蔭有差。俱世襲。時錦奏辭新命爲姪浦乞復都督銜。仍僉事錦衣衛事。下兵部議。會錦歿得寢。已太監滕祥等復爲浦奏。且乞授其



姪保等六人爲錦衣官。爲錦守墓。仍令斌等三十人。兌御馬監勇士以志存恤。上皆許之。科道嚴用和。管大勲。陳聯芳。張櫓等。交章言。浦前以不職。罷不當復。而保等欲藉守墓。冒官職。斌等以廝卒。借勇名。糜廩餼。皆不宜。兵部覆請得報允。

贈故副總兵黃演爲都督同知。

先是虜犯延綏。小芹河演歿之。至是以科臣請卹錄。命立祠享祀。加祖職三級。蔭一子。正千戶。世襲。

太監李芳請裁革內府匠役。工完陞秩官。

時冒銜者以百數。吏部議。畱用閒住。及裁減職級俸薪。食糧供役有差。仍請自後有貪緣乞陞者。聽部叅治。從

之

是年八月裁革內府各監局官匠計六百六十二員有  
逃亡者虛其數量擇革內堪役者補

以景雲殿奉

孝烈皇后專祀尋更名弘孝殿

罷玉芝宮歲時享祀日供膳如舊

初 先帝時建廟奉 睿宗升祔 太廟因罷其祀四

十四年舊廟柱產芝更名玉芝宮欽定祀享禮儀命日  
供膳如內殿歲暮大小節辰牲帛諸品如廟祀 上卽  
位詔下禮部酌議禮部議請罷免止存日供之膳 上  
以出自 皇考孝思復命詳議儀等乃極言我朝 宗

廟之常禮如每年四孟及歲暮大禘則止行于太廟  
大小節辰及烈皇考妣忌辰則止行于內殿未嘗有併  
祭者國有大事或告于太廟或告于內殿亦未嘗有  
併告者今于玉芝宮則無所不祭無所不告是列聖  
皆一祭一告而睿宗則兩祭兩告也其在先帝行  
之則以爲豐于禩廟未爲不可今睿宗于皇上爲  
皇祖考凡事必兩祭兩告則遠而列聖近而先帝  
皇上將何以處之至于日供之膳則有可言者謹考南  
京奉先殿原奉太祖以上列聖神位迨北京  
奉先殿成南京奉先殿各祭俱罷而供膳至今不輟  
蓋以奉安神位之所而持存有舉莫廢之義也今玉芝

宮旣爲 睿宗原廟近又設有 二聖神位故臣等以爲日供之膳宜如舊奉設而悉罷其四時享祫及節序忌辰并有事奉告之祭 上從之然南京 奉先殿乃高皇帝聖靈所寓又遷主于北故仍存日供以見如生之意今以 睿宗視之則有間矣故議者謂玉芝供膳猶爲黷云

起趙貞吉爲吏部左侍郎兼翰林學士掌詹事府事  
戶部奏定內府各監局歲派錢糧

因言內府一切供應大率嘉靖初年與弘治年間數目略同自嘉靖二十年以後徵派漸增視正額加倍臣等仰體 皇上崇儉至意酌古準今悉從裁減乞敕監寺

衙門永爲遵守不得濫議增派本部亦不許曲意奉行得旨各項錢糧依擬減派各該撫按其嚴察有司毋容混徵有負朝廷德意

從戶部議酌定昌平密雲糧運事宜

先是二鎮自嘉靖庚戌坐撥漕糧徑運該鎮邊軍便之已而運軍告困仍改通倉空運奸商猾吏因緣爲奸米至腐爛不可食總督劉燾請復改運該鎮戶部議該鎮糧餉空運則蠹弊雜出爲邊軍病徑運則轉搬甚難爲運軍病宜通融立法自今年爲始將去年漕糧令江北山東二總撥赴兩鎮自後年分循次均派毋得偏累一衛一所密雲糧由通州水路運牛欄山交車戶接運昌

平糧由通州石壩更船至大通橋陸路交車戶接運仍  
什各運官上納從之

三月戊午夜木屋進行守九宿。

降原任光祿寺寺丞萬廷言二級調外任。

先是禮科給事周世選劾工部尚書雷禮以私忿中傷  
廷言出爲僉事。且列禮罪狀宜罷禮奏言廷言推陞在  
吏部非臣所能與緣世選與廷言及胡應嘉爲朋比歿  
友每聚坐夜分。雌黃時事動詆先帝營建謂臣逢迎  
其他指摘皆不根請與世選廷鞫以明心迹事下吏  
部都察院尚書楊博等覆奏廷言以五年進士得拜風  
紀儒臣乃猶以外補爲嫌舉劾乖刺非清朝所宜有宜

重加降罰。禮心迹旣白。而山陵重事。正屬經理。不宜聽其求去。上命降廷言外任。而留禮視事如故。禮科左給事中王治上言四事。

一議宗廟之禮以隆聖考。謂先帝追崇獻皇。大備尊稱。誠萬世不刊之制。至于人廟稱宗事。在今日尤有當議者。蓋獻皇雖貴爲天子之父。實未嘗南面臨天下。而今乃與祖宗諸帝並列。雖視爲武宗之叔父。然嘗北面事武宗。而今乃設位于武宗之右。揆之古典。終爲未合。故先帝于獻皇祔廟之後。世廟之享。猶不忘設是先帝之心。亦自有不安者。臣以爲獻皇祔太廟。千萬歲後不免遞遷。若專祀

世廟則億萬世不改。惟陛下敕廷臣博考詳議。務求至當。以妥獻皇之靈。以光先帝大孝。一議朝講之禮。以圖治安。三議親輔弼之禮。以成德業。四議謹燕居之禮。以澄化源。章下所司。

提學御史耿定向奏科場事宜。

一兩京主考官宜簡學行兼長者。毋拘年資。一同考官宜令廣取正備卷。如未稱。責令再閱。或付別房覆校。主考仍自抄閱落卷。毋避嫌輕棄。一初場分經校閱。二三場宜更易品訂。毋令偏重初場。致遺積學真材。一時義體製浮蔓。宜嚴立程式。字限五百。一揭曉之日。宜以中式硃墨卷發。提學官查驗。鈐封解部。以防僞濫。一監生字



號宜與生員一體彌封。取數仍如舊額。已而御史陳聯芳一意重後場。以羅實學及令兩京同考閱卷。不必書各房字樣。主考止以文學爲去取。毋以考官爲額數。分房爲次第。禮部議覆俱允行。是科去皿字號。監生中式甚少。考官王希烈孫挺謁文廟。被沈應元等遮訴。語不孫。事聞。逮治。爲首數人。如例發遣。尋改爲民。後有旨。令監生編號如舊行。將以調停後來也。

封杜繼宗爲慶都伯。李錦爲德平伯。

繼宗大興人。以孝恪太后弟。封祿一千石。累加一百石。錦。莊皇后父。封祿一千石。

起吏部右侍郎林樹聲辭不允。

逾月再以疾辭許之。

命禮部酌議一切應免謝疏。

議在京文武官遇冊立等大禮合進一表其聖節正旦冬至止于丹陛前致詞稱賀一應陞遷賞賜既經面恩廷謝者俱不得具本稱謝南京并在外五品以上衙門及各總兵官凡遇三大節進表慶賀照常例行或值冊立等大禮例應慶賀者須待本部題允方許撰表齎進其總督撫按俱不得違例進表稱賀南京五府掌印官六部都察院堂上官大理寺正官及各處總督巡撫官皆係重臣一應陞遷及經論劾留用或軍功受賜遠鎮給賞等項既不得廷謝仍許具疏三司將佐等官

一同受賞者。總兵督撫卽與併謝。不得另奏。其疏務明白簡直。不得牽合四六之體。務爲浮蔓之詞。不遵者聽本部及該科叅奏。詔如議行。

降太常寺掌寺事禮部侍郎師宗記爲本寺少卿。

少卿魏承詔袁好禮爲寺丞。宗記等皆以道流致列卿御史王得春劾其冒濫宜罷。下吏部議。謂宗記等素習祝贊之事。請姑降級叙用。今後卿及少卿有缺。皆于科目中推舉從之。

命纂修 世宗實錄。

以成國公朱希忠大學士徐階李春芳郭朴高拱陳以勤張居正爲總裁。高儀趙貞吉林樹聲潘晟殷士儋爲

副總裁姜金和等爲纂修官。

詔贈故刑部左侍郎劉玉爲刑部尚書諡端毅。

賜祭一壇有司治墓初王以大獄罷士論寃之至是以恩例恤錄故有是命。

夏四月戶部覆御史劉勦條奏鹽政四事。

然其事竟寢不行。

詔復駙馬都尉鄢景和原職。

景和在先帝時入侍直贊意頗不樂先帝覺而遠之。後于謝賞疏引馬革裹屍語詔下法司問狀削職至是科道張鹵陳聯芳疏其忠直無罪遂復官。

史部主事郭諫臣上言六事從之。

一正一真人。不當復令世襲。一皇親玉田伯蔣榮安。平伯方承裕。宜止本身。照泰和伯陳萬言例。著爲令甲。一衍聖公遇有親喪。宜令守制。其襲封所司代奏。候服滿起。送承襲。服內免其入賀。一太常鴻臚禮樂之司。正卿宜用進士。令其參酌禮儀。約束官屬。別途出身者。太常至少卿而止。秩滿止許加俸。其制誥兩房中書官。不得陞列九卿。一兩司方面圓缺。宜于本省。或隣省就近遷轉。令刻期赴任。一府縣官賢能者。宜久任。其治行卓異者。知府歷二三考。得陞叅政。知縣歷二三滿。得陞左右給事中。得旨允行。

收殷士儋爲吏部左侍郎兼職經筵日講如故。

刑部尚書黃光昇以疾乞致仕許之。  
詔追贈故新建伯王守仁爲新建侯。

謚文成。賜祭七壇。都督周尚文爲太傅。謚武襄。大學士  
蔣冕爲少師。謚文定。吏部尚書喬宇爲少傅。謚莊簡。各  
祭九壇。禮部尚書汪俊爲太子少保。謚文莊。祭一壇。戶  
部尚書王杲爲太子太保。祭四壇。刑部尚書喻茂堅爲  
太子少保。祭二壇。各命有司治墓。少詹事黃佐爲禮部  
侍郎。僉都御史朱方爲副都御史。各祭一壇。南京禮部  
侍郎呂柟爲禮部尚書。謚文簡。大學士石琚爲少保。改  
謚文介。追奪尚書顏可學。徐可成。侍郎朱隆禧。郭文英。  
贈謚誥命。及什其諭祭等碑。奪侍郎張電誥命。從都給。

事中辛自修御史王好學等言也。

平虜衛地震。

五月以漕軍重困詔臨清免運船帶磚。

詔復故大學士楊廷和等原職尋贈官贈諡有差。

廷和諡文忠贈太保王廷忠肅敏聶保貞襄皆少保梁材端肅太子太保徐問莊裕林俊貞肅吳廷舉清惠皆太子少保曾銑襄愍楊守謙恪愍商大節端愍皆贈兵部尚書孫繼魯清愍兵部左侍郎鄒守益文莊禮部左侍郎羅洪先文恭光祿寺少卿仍蔭廷和一子爲尚寶司丞銑守謙大節繼魯各一子爲國子生尚書劉認贈太子少保侍郎程文德贈禮部尚書汪 贈兵部尚書。

翟鵬復尚書職。張漢復侍郎職。又以給事中岑用賓。書賜唐胄祭一壇給葬之。半罷。故江西副使汪一中。專祠及其子蔭。以御史陳省言。追奪。故副都御史盛端明。贈諡誥命。勒原任文選司主事史際閒住。

虜犯大同。參將劉國引兵禦之。戰于西山。虜遁去。詔罷寶坻縣等處採取魚鮮。著爲令。

降御史齊康二級調外任。

初康以高拱屢被論劾。疑徐階主之。乃疏論階檢邪貪穢專權。竊國狀。復言。先帝往欲建儲。堅執不可及。皇上居極階。懷疑懼。遂屢稱病。以嘗上意。又與李春芳聲相倚。有旨切責康妄言。令階春芳安心視事。於是



階疏辭春芳亦乞休。上皆溫旨答之。科道陳瓚歐陽一敬陵儒張櫟交章劾康爲拱門生聽其指授宜寘諸法。寺丞海瑞言階事。先帝無能改于神仙土木之誤畏威保位誠亦有之。然自執政以來憂勤國事休休有容亦有足多者。康搏噬善類其罪又浮于拱。左都御史王廷言拱前後被劾不引咎輒復逞辯以故言者不已。康懷奸挾私黨邪悞國不重治無以慰人心。定國是尚書楊博侍郎遲鳳翔樊深等各奏康妄言乃重謫康而諭階。

大學士高拱懇疏乞致仕許之。

時凡卿大臣南北科道紛然奏詆連章持疏不下數十。

其持論稍平者勸上亟賜拱歸以全大臣之體其他詞不勝憤輒目爲大兇惡寺丞何以尚至請尚方劒誅拱巡按御史在邊方者轉相倣效拱稱病乞休疏屢上上恩禮有加拱終不出上知拱不可畱乃報許命馳驛還鄉調治仍賜白金文綺遣行人護送遣檢討許國給事中魏時亮頒卽位詔于朝鮮六月釋高墻禁錮庶人克瑛等。

并庶人聰澣等家屬還本府有司給養贍米如例命南京工部解織造餘積料銀濟邊。

戶工二部未解者悉停止應天府仍追徵准明年料價詔天下暫免決囚。

詔革太和山分守徵太監呂祥還。

時御史陳省劾祥七罪。兵部覆言宜罷。上是之。已而用監丞劉進得都給事歐陽一敬諫。而更用監丞柳朝。仍兼分守。兵書郭乾執奏乃改給朝提督太和山關防。毋兼分守。

乙亥夜月犯畢宿右股北第一星。

紫荊關雨雹。免陽和。高山二衛屯糧。

陞大理寺右寺丞海瑞爲左寺丞。御史耿定向爲右寺丞。秋七月。陞兵部職方司郎中周冕爲太僕寺卿。追復吏部尚書李默原職。賜祭四壇。

罷南京振武營諸選募。孝陵衛餘丁千餘人。

入隸大小教場神機等營。同正軍操備。身終勿補各將官家下。及前尚書李遂調淮揚民兵五千餘人俱散遣之。諸悍卒銷除矣。

命侍郎趙貞吉暫攝國子監事。

時御史方新追論祭酒胡杰徃典試南京與諭德吳情罪同罰異乞并黜都給事王治等言杰卽無他業已爲人指數恐其慙于講席得旨改杰別衙門用杰不自安再疏稱疾求去許之。

八月 上幸大學行什奠禮。

贈故尚書彭澤等官。

澤少保顏頤壽太子少保何孟春禮部尚書楊最副都

御史石金喻希禮光祿寺少卿故貴州提學副使蔣信復其官并謚澤襄毅孟春文簡最忠節仍賜祭葬。

復故總督薊遼右都御史王忬官。

因其子世貞上書訟父冤也。

降太常寺少卿周怡爲山東按察司僉事。

怡上疏陳五事上以爲抗違命降之然其言亦迂誕。

增築宣府鎮城。

遼東鎮臣計擒叛賊黃勇以聞伏法。

召譚綸與戚繼光入京。

吳時來言綸繼光俞大猷皆知兵宜召來使專督練邊兵以省諸鎮徵調之擾兵部覆言大猷才宜于南且老。

矣綸與繼光惟上所用故召之

贈故員外郎申良爲太常寺少卿

給事中張遠常泰右春坊周鐵俱光祿寺少卿先是吏部議恤以光祿少卿馬從謙及良等名上上不許復引例奏請亦報罷蓋從謙以劾中官杜泰得死故中貴人撓之于是科道王治龐尚鵬各上疏援部議力爭上以從謙所犯比子罵父律終不允惟申良四臣得追贈云

九月命太監呂周高相陶金坐團營尋罷之

兵部尚書郭乾執奏謂團營之制起于景泰經先帝裁革盡復二祖三大營之舊官有定員不用內侍

上不聽。科道歐陽一敬孫、枝韓、君恩等各上疏力爭。章下輔臣徐階。反復言內臣委無團營可坐事體有碍施行。上從其言。

虜寇薊鎮

虜由界領口羅漢洞潰牆入。大掠昌黎等縣。時宣府報西虜黃台吉擁兵窺伺。陵後南山兵部以聞。上命總督劉燾總兵李世忠巡按耿隨卿東禦土蠻總兵劉漢西防黃台吉。遣京營叅將陳良佐防護。陵寢總督王之誥自鴈門還駐。懷來巡撫曹亨自保定移兵于通州以備之。

大學士郭朴乞致仕。許之。

令馳驛歸。初，龐尚鵬論朴負才使氣，無相臣體。上不聽，而凌儒復詆其父喪奪情，毋老忘歸。于是朴求去益力。章三上乃得允。然朴爲人長者，儒之尋端力攻，時以傾危目之。

蔭原贈光祿署丞孫鏜男尚恩爲國子生。

鏜松江賈人，嘗糾集山陝諸商協力禦倭。先帝嘉其節，故贈蔭之。

冬十月癸未夜，金星入南斗。

御史耿定向上明學術，正人心疏。

南京禮部左侍郎陳陞卒。

陞以奉命勘估皇陵修理工役，至鳳陽病卒，爲人



醇謹有清譽。嘗預修大明會典。同考會試者二。主考應天鄉試。提調禮部會試各一。計聞。上以陞沒于公事。贈禮部尚書。謚文僖。祭葬如例。

逮原任宣大總督都御史楊順。巡按御史路楷下獄。論死。先是錦衣衛經歷沈鍊。疏請誅嚴嵩。謫發保安州爲民。嚴父子銜之。會順總督宣大。嚴以鍊屬。順殺之。適虜犯大同。諸衛堡殺掠甚衆。順不能禦。反縱兵妄殺被虜者。冒報首功。鍊不平。爲詩刺之。有白草黃沙風雨夜。冤冤多少覓頭顱之句。順亦恨鍊。遂與楷謀誣鍊以交通妖賊閻浩。勾虜寇邊。當斬。阿嚴氏父子意使叅議朱天俸僉事許用中。文致成獄。鍊竟坐死。士論寃之。無何順以

虜人應懷不能禦。又殺平人冒功。爲給事中吳時來所劾。楷亦以順黨不能實奏。并逮治京法司言順守備不設。爲賊所陷。論斬楷。奏事不實。輸徒作。嚴氏深德之。順竟免死。謫戍振武。衛楷降。雜職邊方用。嚴氏旣敗。鍊以遺詔褒恤。至是。科臣陳瓚追論順侵盜。賑恤銀及盜邊儲銀七千兩。路楷與共殺鍊。謫戍未盡。其妻鍊子襄亦爲父訟冤。乃命逮順。楷下法司。及錦衣衛鞠治。俱坐交結近侍律斬。妻子流二千里。並追其所盜賊銀。天俸用中。下巡按御史提解來京問。時法司及錦衣衛言天俸用中強阿順。楷意殺沈鍊。然非其本謀。不過委靡阿私。宜稍從末減。得旨宥死。發邊衛克軍。明年四月。楊順

死獄中。

十一月癸亥。上親南郊。行大祀禮。

親郊之典。久缺不講。上初嗣服。即命禮官。綴葺舊章。行之。稱快覩云。

以海瑞爲南京通政司右通政。

十二月。河南布政司右叅議謝廷瀉予告。

賜何塘諡文定。復夏言吏部尚書職。

復故戶部尚書萬鏜等官。

副都御史江潮。御史郭弘化。王時柯。郎中胡璉。主事余禎等。亦復原官。仍加贈鏜太子太保。潮兵部侍郎。俱賜祭葬。璉太常少卿。弘化時柯禎。俱光祿少卿。諸臣皆一。

先帝時以建言得罪者鍾以諫百花酒爲趙文華誣廢  
祿職潮以勘問妖犯李福達劾奏武定侯郭勲罷弘化  
以諫採珠採木削籍時柯璉禎並以議大禮廷杖下獄  
璉禎杖歿時柯編伍至是江西撫按任士憑蘇朝宗奉  
遺詔疏名以上故有是命。

戊辰隆慶二年正月辛亥朔。

允行永平海運。

巡撫順天都御史劉應節等以永平西門直抵海口至  
天津凡五百餘里可通漕戶部覆言故事獨薊鎮有遮  
洋總而無永平海運今驅漕卒冒不測之險于計不便  
卽如撫臣等言請以山東河南額派薊鎮漕糧分撥折

色十萬石。俱改本色運至天津交兌。永平通判指揮等官。徑自領運。不必兼同原運官軍。其沿途轉般入倉工費。皆如漕規扣給。以原撥永平民運及太倉所發年例如數抵還薊州。上從之。

詔革正一真人名號。奪其印。

張氏自東漢建武中。張道陵以修煉符水術起。傳數世。有張魯者。號能攝役鬼物。愚民神而祀之。魯之子元忠。卽道陵煉丹處。設壇授法。唐會昌間。始賜額真仙觀。宋大中祥符間。王欽若奏改爲上清觀。元至正中。始封正一教主真人。主領符錄事。國朝因令承襲。傳至嗣孫張永緒。以淫縱聞。術益衰。永緒死無嗣。江西守臣因言。

張氏職名賜印。不載典制。且隱稅逃役。公行吞噬。無功有害。宜永爲裁革。禮部覆如守臣言。請革其封號。止以裔孫張國祥爲上清觀提點。鑄給提點印。上從之。禮部尚書高儀等覆上疏。請立東宮。

以宣德成化弘治間冊皇子。皆二齡六齡事例爲據。上乃命擇日具儀以聞。

議革浙江水陸官兵。

兵部覆浙江撫按官趙孔昭等奏。浙江水陸官兵應革者八千人。歲減兵餉銀共一十四萬餘兩。止徵銀二十二萬兩有奇。以給存留官兵。又寧波旣設海道副使。兵備事可以兼攝。其紹興兵備可省。令寧紹台分守。叅議

移駐紹興。台州兵備僉事兼分巡三府。至于寧紹台叅將各防禦信地。仍聽總兵官居中調度。上皆從之。

改戶部右侍郎萬士和爲禮部右侍郎。  
黜給事中石星爲民。

星條上六事。一曰養。聖躬。鰲山燈事。旣不可追。酒色之害。實當深警。二曰講。聖學。願卽將經筵及時舉行。三曰勤視朝。願從日出視朝。以周知民情。以總理萬幾。四曰速俞允。願于尋常章奏。三日而下。兵機之事。則不時進覽。五曰廣納言。陛下下詔求諫。未幾而少卿周怡卽以言觸忌諱。怒而出之外任。給事中陸鳳儀以偶遺。聖旨怒而出之。爲民伏望。陛下召還二臣。俾復

舊職仍論諸臣勿以二臣爲戒六曰察讒譖間有一二  
內臣專作威福肆爲無忌因言官攻發其奸遂怒目切  
齒欲行中傷惟 皇上深燭其情于凡一切譖毀之言  
悉置不行疏入 上怒以爲惡言訕上無禮 命廷杖  
六十黜爲民

給事中王璽等言內庫之弊

其在外者有三曰包攬花費曰解戶私逃曰那移延緩  
其在內者有四曰鋪墊常例曰守門科剋曰茶果餽儀  
曰棍徒需索誑騙得旨俱如議行

兵部左侍郎鮑象賢卒

詔贈工部尚書賜祭葬如例象賢爲人廊達練事多大



略歷任三十餘年所至有聲時論稱之。

附錄太監李芳等請停徵近年加增白熟細粳米四千五百石。白青鹽二萬斤。以後歲辦止。照成化弘治年間例。米方一千五百石。鹽十二萬斤。上嘉其節惠愛民從之。

二月南京刑部侍郎吳悌卒。

詔賜祭葬如例。悌清修剛介。生平一節。士論與之。

論山西石州被虜功罪。

先是九月虜俺答寇山西石州陷之。殺知州王亮留壁石州。間出精騎剽掠交汾等處。山西騷動。又會有薊鎮之警。京師戒嚴。上命羣臣集議防虜之策。階等條上

責實效定責任明戰守申軍令重將帥練軍兵繕城堡  
團民兵處久任廣招納諸人材理鹽法擇邊吏凡十三  
事上皆詔行而邊臣不能用效虜入邊已二十餘日  
勢甚橫後以在內地久氣亦疲又雨潦淹旬馬倒歿者  
過半皆杖馬箠徒步歸所鹵獲多不能盡載往往遺棄  
於道浸尋蹢躅至十餘日始出邊而我軍無一人禦之  
者第早從王之誥之請趣令西援雖無救于汾石之禍  
猶得以擊其情歸或頗有所獲以紓華人之憤而當事  
者昧於機宜及爲虜偏師所綴令其得志益輕中國殊  
可恨也虜旣去汾石申維岳始約孫吳兵進戰及虜出  
岢嵐東北吳竟以非已信地引還大同而維岳田世威

終不敢戰之誥遣二將亦皆還延不見虜而還又十有  
四日虜悉遁去諸將乃稍稍出獲奸細明海俘董噏兒  
黑里器及他老幼疲弱類以掩襲得之獨方振一與虜  
遇九月逐虜於嵐縣晉明村伯稱敢戰而已事聞上  
命奪鎮撫總督等官俸令回籍聽勘而逮繫維岳及世  
威劉寶王學謨至京鞠之下御史勘實至是御史王漸  
勘上因劾之誥等罪推振月功下法司會議法司以地  
方遠近兵力衆寡分別議罰請首治維岳世威寶及繼  
洛學謨僨事殃民之罪守備楊時隆以下不守信地罪  
次之太原府同知李春芳岢嵐州知州王下賢繕修不  
完黑雲龍等備禦無策隰州知州魏宗芳等收歛不早

罪又次之。之誥專守南山難于遙制。吳失於應援而衆寡不敵。宜薄其罪。議上得旨。維岳世威寶各斬。繼洛學謨謫戍邊。春芳下賢降三級之誥。降二級。聽用吳落職。克爲事官。管事雲龍宗方時隆等及各分守管操等官。下巡按御史提問以聞。振月各陞二級。賞銀二十兩。先後捕獲奸細明海等及叛人董噍兒等。黑里器等俱斬。以徇。時邊臣巽愼怠玩。掩罪冒功。積弊已久。故恣虜出入。動得利去。至是議罰將士始知畏法焉。

乙酉。皇第四子生。

聖駕親祭先農。躬耕籍田。

命大學士李春芳掌詹事。禮部尚書殷士儋爲會試考官。

取中田一儁等四百人。

壬辰經筵開講。

減江陰縣歲進子鱗魚之數。

縣歲例進新子鱗魚萬斤。路遠數多不堪。上用光祿卿趙錦請。自今止貢五十斤。餘皆折色。便從之。

改南京禮部尚書趙貞吉爲禮部尚書。

初貞吉以起廢詔。日侍講讀。時年六十餘。然氣壯甚。議論侃侃。輔臣薦其可大用。上心屬焉。及遷南京吏部右侍郎林煥代。一日上手詔諭輔臣。調燠南京用。而召貞吉還爲講官。添註詹事府。與尚書殷士儋協管府事。已而士儋以府事讓貞吉。不允。

命都應龍唐繼祿龐尚鵬分理各省直鹽屯。

應龍總理兩浙福建二運司雲南廣東各提舉司兼理江西浙江福建兩廣雲南貴州湖廣等處鹽屯繼祿總理河東運司陝西花馬池四川提舉司兼理宣大山西陝西四川等處鹽屯龐尚鵬總理兩淮長蘆山東三運司兼理江北山東薊遼保定河南等處鹽屯各給總理鹽屯關防賜之敕。

丁未。上詣天壽山展謁諸陵。

庚戌。駕還京。

三月陞刑部右侍郎洪朝選爲本部左侍郎南京吏部右侍郎鄭世威爲刑部右侍郎順天府丞吳時來爲南京右

僉都御史提督操江右通政姜寶爲南京國子監祭酒。

辛酉上御皇極殿傳制冊立皇子爲皇太子。

詔起吏部右侍郎林樹聲原職陞譚綸爲本部左侍郎兼右僉都御史總督薊遼保定等處軍務。

廷試賜羅萬化黃鳳翔趙志臯等進士及第出身有差。先是內閣已取定李長春主家屏田一僦矣奉旨易二甲進士前三人踰月改長春等及沈一貫張位李維禎等三十人爲庶吉士。

丙子。上幸南苑。

先是左右有言南海子之勝者。上欣然欲觀。階等奏止不聽。是日駕至。則荒莽沮濕。官館不治。上亦悔。

之遂 命還蹕

命太監李佑往督蘇杭織造

工部及科道孫枝祁杰各疏乞罷遣官不聽明年二月詔以太監陳洪所呈花樣續發佑趣辦一千八百六十疋工部科道皆以民力難堪爲言上不允御史賀一桂劾洪惑上病民蠹政謀利下所司四年二月太監崔敏傳旨令南京加造段疋數至十餘萬工部復言加徵不如趣正供之爲易新派不如責舊逋之爲速上頗然之乃令加派數中惟供御用者別造三分之一其他准歲造額六年二月詔遣內臣往蘇杭織造龍袍翟服絨錦鸞帶都給事中陳行健御史侯居良疏請停



止不允。于是工部言蘇杭自倭患之後。瘡痍未起。加以水旱流移。府庫虛竭。而織造之費甚鉅。勢必加派。民困難支。請大加減免。或去其半。至于差官。尤宜慎重。擇忠謹之人。安靜行事。庶地方不擾。而民獲更生。上可其奏。令會同該局。擇最要者。先行造進。所遣官。務宜安靜。毋得擾民。

四月。命追奪承天府元佑官田入官。

官玄妙觀也。自陶仲文請易今名。以爲祝延聖壽之所。而高士劉永德。因奏乞供養之田。歲八千七百餘斤。至是從撫按劉愨言。追奪之。徵其租。以供漢江築堤之費。

贈侍郎王道爲禮部尚書

賜諡文定南京兵部尚書湛若水諡文簡故太僕寺卿李舜臣賜祭葬如例

五月令薊鎮練遊兵仍募鳥銃手三萬三千於浙

總督都御史譚綸疏言今之策虜事者皆曰乘障曰設險然計薊冒見卒不滿十萬而老弱且半又散布于二千里之間率畫地數丈而守以一軍虜數以十萬衆攻我一面欲虜勢不張不可得也故言者亟請練兵然臣以爲遊兵破虜誠爲制禦長策而行之有四難虜長技在騎而我制之非車不可顧虜人動十餘萬而吾車戰不過三萬人非有見伍勢不得不召募之兵與尺籍軍

異召募之軍非強壯不入選既無素養之恩有疾輒汰  
又無歸老之計既以車戰又無馬料自非酌擬尺籍軍  
之食而稍優之必不樂從計三萬人宜各月給銀一兩  
五錢歲費五十四萬司農告匱是一難也燕趙之士雖  
多慷慨自備胡以來銳氣盡矣非募吳越習戰卒萬二  
千人雜教之事必無成此萬二千人者臣與戚繼光召  
可立至用之可立効教成之後留之實邊可使從者半  
散之歸農可立効無後憂而時方疑其用之不可止散  
之不可南虞其有他是尚以臣與戚繼光不可信夫不  
能信矣尚能任之專哉此二難也軍旅之事務在威嚴  
燕趙之人素驕驟見軍法不無大駭且去京師近流言

易生徒令忠智之士掣肘廢功。且釀他患。是三難也。我兵素未當虜戰而勝。虜不心服。能再破之。乃終身創矣。第慮忌嫉易生。不能戮力再舉。此四難也。臣熟思之。不如姑就薊鎮見兵。講求戰守之策。除乘障應援者。皆如故。昌平總兵所轄地方兵。亦就彼訓練如故。若臣標下兵二枝。振武營遊兵一枝。順天巡撫標下兵一枝。遵化遊兵一枝。薊鎮總兵標下兵二枝。又聽臣於大名井陘二兵。備道選民兵一枝。調真定遊擊標下民兵一枝。真定等府達官舍及各路防秋民兵中選一枝。共爲十枝。每枝務足三千人。若尚不足。又聽臣于十路稍緩策應。兵中選取共三萬人。列爲三營。管分爲三軍。一營駐密

雲一營駐遵化各用叅將一員遊擊一員一營駐三屯營中軍屬於總兵郭琥左右二軍仍用叅將遊擊各一員如法訓練專備禦戰仍付戚繼光以總理薊遼保定等處練兵總兵官之職而命巡撫劉應節專任提調臣實總督之每遇春秋兩防三營之軍各移近邊密雲營屬密雲兵備副使遵化營屬薊州兵備僉事三屯營屬永平兵備叅政各隨營監督而臣與應節繼光往來督勵小警自禦大入併力務各負牆以戰禦之邊外此爲上策萬一乘罅潰入臣等決一死戰以收桑榆之功亦不失爲中策若先事不能禦後事不能戰掩取微功苟圖塞責是爲無策臣等罪安逃哉又言中國長技無如

火器欲練兵三萬必得鳥銳手三千人爲衝鋒而戰習  
邊人非遲之一年不可今防秋期迫請選取浙兵三千  
人以濟一時之急期以三年俟邊軍旣練乃遣願留者  
聽惟 陛下裁擇疏下兵部主綸議請命繼光仍以署  
都督同知總理薊昌保定練兵事務該鎮總叅遊等官  
凡受總督節制者并受繼光節制本官仍受總督節制  
府州縣官不得阻撓違者聽綸叅奏處治給以敕書符  
驗關防旗牌又請遣錦衣衛官二人往浙江募寧紹台  
溫金衢等處鳥銳手三千人給善器恤其家屬優其資  
用付杭嘉湖叅將胡守仁原任叅將李超將之而北無  
誤防秋至鎮之日人給衣鞋銀一兩日給銀五分費暫

出太僕寺。以後戶部更議其分立三營事。令繼光會譚綸熟計。以聞得旨。繼光以原總理總兵事務防秋。以邇所取南京令巡撫趙孔昭責令守仁超選募督發。不得違怠。致悞軍機。各兵在途。錦衣官稽督守仁等嚴行鈴束。所過騷擾。其他悉如部議。

追錄故新建伯王守仁平宸濠功。令世襲伯爵。

先是嘉靖初。守仁已受封。會忌者媒孽其事。異議紛然。遂見削奪。上卽位。始命江西撫按官勘覈向來功狀。至是以聞。下吏部會廷臣議。皆謂守仁勘定禍亂之功。較之開國佐命。時雖不同。擬之靖遠威寧。其績尤偉。當時爲忌者所抑。大功未錄。公議咸爲不平。今宜補給誥。

券令其子孫承襲世世勿絕以彰朝廷激勸之功從之

賜原任山西巡撫都御史趙時春祭

初時春選庶吉士授兵部主事嘉靖九年以建言革職二十八年薦起除翰林院編修十九年復以建言革職二十九年薦授兵部主事歷僉事副使巡撫山西被劾去官隆慶元年復薦起未及用遂卒於家時春爲人沉毅慷慨敢於任事又習騎射有將略時重其才都御史王崇古爲請祭塋部議時春四品未考滿以軍功特予祭一壇

兵部請移改三關將官



兵部言山西一鎮舊以大同爲藩籬警備差少自嘉靖  
壬寅失事之後大同棄墻不守遂與虜隣三關邊隘皆  
虜必犯之地矣然鎮城尚在內地虜必糾合諸部乃敢  
深入故在關南則憂大舉偏元一帶迫近虜巢居常則  
有遊騎出入之苦遇冬又有套虜履冰之備故在關外  
則慮零寇今寧武在忻代偏崙之中既有總兵官駐之  
東西有警便于策應至如老營堡遊擊宜移駐馬站河  
西守備宜改爲叅將駐灰溝營水泉營防守宜改爲守  
備以便防禦其募軍買馬費請發太僕銀二萬五千兩  
給之

原任光祿寺丞胡膏以罪擿死

先是胡膏侵冒官鰲銀四百兩。爲巡視給事中楊允繩所劾。膏誣奏允繩毀訛玄修。先帝怒。下允繩獄。論死。而膏亦謫四川重慶府通判。稍遷同知。尋以賍敗。至是給事中李用敬追論其奸。詔下御史逮問膏論斬前所侵冒銀還官。沒入其田宅服器。都察院具獄得旨。如擬。

令變賣種馬之半。

每馬價銀十兩。徵收草料銀二兩。從太常寺少卿武金言也。

六月。詔停差真定抽木內臣。

是差歲令府佐領之。給金牌勘合十道。

皇明大政紀 卷之五  
七月。敕刑部侍郎洪朝選錦衣衛指揮程堯相勘問遼王  
憲燦罪狀。

命執內使杖爲首者一百發。烟瘴地充軍。

內使許謙坐挾刃赫人財事發。巡視中城御史李學道  
不候叅提遂執而笞之。其黨皆忿恨不平。是日朝罷有  
內使百餘人突出。至左掖門。捽學道衆中奮挺毆之。踣  
地。百官相顧錯愕。時吏部尚書楊博向錦衣衛陸炳曰。  
此君責也。陸乃命校尉識認衆乃解。臺省不能平。交章  
論奏。司禮監問計于徐階。階言內監合先發。庶好輕處  
司禮從之。階乃擬旨杖爲首者一百遣邊戍。餘各杖六  
十。發充孝陵衛軍。學道亦以擅笞內侍不諳事體調

外任。

大學士徐階上疏乞休。上許之。

命馳驛遣行人護送歸。有司歲給夫八名。月給廩六名。仍賜敕諭。

斬福建行都司都指揮傅應嘉。

巡撫涂澤民巡按御史王宗載劾奏應嘉受賄縱海賊吳平。罪當斬。上命卽其處會官斬之。

禁內宦進貢。多用馬快船竊載私貨者。

從南京兵部劉采言也。

八月。雲南叛酋鳳繼祖平。

先是繼祖與尋甸土舍鄭竑爭襲。叅政盧岐疑使使諭

解不聽。反執殺竑。而發兵圍武定府城不克。還襲敗通判胡文顯。周良卿等。兵備僉事張澤歿之。知府周賚等率兵近擊於法岡渡。亦敗。滄瀾兵備副使楊守魯等。乃大集土漢兵與賊遇於會姜。連破之。賊潰走至雞羅山墜崖谷死者不可勝計。官軍追及之。因縱反間入賊中。購以重賞。於是賊黨遂斬繼祖首。詣軍門降。事聞。上命賞巡撫呂光洵。譚綸。總兵沐朝弼等。陞楊守魯一級。是役也。土官助戰効勞者。祿紹先而下十餘部。惟易門縣土官縣丞王一心。陰與繼祖合約爲內應。會事露。爲百戶韓世賢弟生員世仕所擒。與繼祖捷音先後列上。上仍命加賞光洵。朝弼銀幣。世仕送監讀書。

都給事中何起名條上四川鹽茶二事

謂保寧府一州三縣茶徵本色輸運甚艱宜如嘉靖中舊例改徵折色或解藩司爲賞番之費或解陝西備買馬所用之設甘州茶馬司當爲裁革川中鹽場舊定上中下三則納課邇來井塌丁逃舊者有破納之累新者有增課之擾宜酌出產厚薄以定課額招集竈丁廣開小井以補舊數而保寧重慶嘉定潼川夔州商不利販涉宜量增引票使之就近告給仍嚴立禁防使奸商不得影射官吏不得誅求得 旨允行

兵部覆請優錄降人白春等并議招降賞格以聞

初大同妖人丘富者入虜中教爲城堡宮室布滿豐州

川名曰板升。以居中國被虜亡命之衆。每入寇。輒使前驅爲嚮道。邊民苦之。上卽位之初。詔懸賞格。降人應募者以千計。而白春等五人。已各有部落。畜產饒富。至是聞風。各率衆來歸。上嘉之。命授附近衛百戶。賞銀五十兩。仍懸賞格于邊外。

復誠意伯劉世延爵。

世延旣廢。後南京科道岑用賓等。交章薦之。世延亦上章訟過。俱下吏部。集廷臣議。謂世延先祖基。有開國翊運功。世延前以奏事狂誕。非有大故可棄。上從之。故有是命。

大學士張居正疏陳六事。

一省議論。伏望掃無用之虛詞。求躬行之實効。欲爲一事。須審之於初。務求至當。及計慮已審。卽斷而行之。如唐憲宗之討淮蔡。雖百方沮之。而終不爲之搖。欲用一人。須慎之於始。務求相應。既得其人。則信而任之。如魏文侯之用樂羊。雖謗書盈篋。而終不爲之動。再乞天語。叮嚀部院等衙門。一切章奏。務從簡切。是非可否。須明白直陳。毋得彼此推諉。徒托空言。一振紀綱。近年以來。紀綱不肅。猥以模稜兩可。謂之調停。以委曲遷就。謂之善處。故情可順而不可徇。法宜嚴而不宜猛。伏望刑賞予奪。一歸之公道。而不必曲徇乎私情。政教號令。必斷於宸衷。而毋致紛更於浮議。仍乞敕下都察院。



查照嘉靖初年所定憲綱再加申飭。秉持公論。振揚風紀。以佐皇上明作勵精之治。一重詔令。近日以來。朝廷詔旨。多廢格不行。抄到各部。槩行停閣。一切視爲故紙。至于應勘應報。奉旨行下者。各地方官尤屢違慢。有查勘一事。而十數年不完者。文卷委積。多致沉埋。干証之人。半在鬼錄。年月旣遠。事多失真。遂使漏網終逃。國有不伸之法。覆盆自苦。人懷不白之冤。是非何由而明。賞罰何由而當。伏望敕下部院等衙門。凡大小事務。旣奉明旨。須數日之內。卽行題覆。有合行議勘。問奏者。亦要嚴立限期。責令奏報。該部置立號簿。登記註銷。如有違限不行奏報者。從實查叅。吏部卽以此考

其勤惰以爲賢否。一覈名實。器必試而後知其利鈍。馬必駕而後知其騫良。今用人則不然。稱人之才不必試之以事。任之以事不必更考其成。及至僨事之時。又未必明正其罪。惟魯少文者。以無用見譏。而大言無當者。以虛聲竊譽。倜儻抗直者。以忤時難合。而脂韋逢迎者。以巧宦易容。其才雖可用也。或以卑微而輕忽之。其才本無足取也。或以名高而尊禮之。或以一事之善。而終身借之以爲資。或以一動之差。而衆口訾之以爲病。加以官不久。任事不責成。更調太繁。遷轉太驟。資格太拘。毀譽失實。且近來又有一種風尚。士大夫務爲聲稱。舍其職業而出位。是思建白條陳。連編累牘。至覈其本等。

職業及屬茫然。此皆所謂名與實爽者也。臣願皇上  
慎重名器。愛惜爵賞。用人必考其終。授人必求其當。仍  
乞敕下吏部。嚴考課之法。審名實之歸。遵照祖宗  
舊例。凡京官及外官。三六年考滿。毋得槩引復職。濫給  
恩典。明白開具稱職。平常不稱職。以爲殿最。毋徒眩於  
聲名。毋盡拘於資格。毋挫之於毀譽。毋雜之以愛憎。毋  
以一事槩其平生。毋以一青掩其大節。一固邦本。今風  
俗侈靡。官民服舍俱無定制。外之豪強兼併。賦役不均。  
花分詭寄。恃頑逋欠。偏累小民。內之官府造作。侵欺冒  
破。奸徒罔利有名。無實各衙門在官錢糧漫無稽查。假  
公濟私。官吏滋弊。凡此皆耗財病民之大者。若求其害

財者而去之。則亦何必索之於窮困之民。以自耗國家之元氣乎。前項催督御史事完之後。宜卽令回京。此後不必再差重爲地方之病。其屯鹽各差。都御史應否取回別用。但責成于該管撫按使之悉心清理可也。一飭武備。今議者皆曰兵不多。食不足。將帥不得其人。臣以爲此三者皆不足患也。夫兵不患少而患弱。今軍伍雖缺。而糧籍具存。若能按籍徵求。清查影占。隨宜募補。着實訓練。何患無兵。捐無用不急之費。併其才力。以撫養闔閭之士。何患無財。懸重賞以勸有功。寬文法以伸將權。則忠勇之夫孰不思奮。又何患于無將。臣之所患。特患中國無奮勵激發之志耳。故願皇上急先自治之

圖堅定必爲之志。屬任謀臣。修舉實政。不求近功。不忘有事。熟計而審行之。不出五年。虜可圖矣。至於目前自守之策。莫要於選擇邊吏。團操鄉兵。併守墩堡。令民收保。時簡精銳。出其空虛以制之。卽虜入犯。亦可不至大失。臣又考之古禮。及我祖宗故事。俱有大閱之禮。以習武事。而戒不虞。今京城內外。守備單弱。臣嘗以爲憂。伏乞 敕下戎政大臣。申嚴軍政。設法訓練。每歲或間歲季冬農隙之時。恭請 聖駕親臨校閱。一以試將官之能否。一以觀軍士之勇怯。注意武備。整飭戎事。亦足以伐狂虜之謀。銷未萌之患。誠轉弱爲強之一機也。疏入。上曰。覽卿奏。皆深切時務。具見謀國忠懇。該部院

看議以聞。於是都御史王廷等覆振紀綱重詔令二事。析爲八款。一慎政令。自今凡遇大政大款。先行九卿科道會議。仍照閣臣令其參酌衆人見聞。稽之本朝故事。應否舉行。明白具奏。更望行止。決于一人。用舍公平。天下。一專責成。十三道掌道御史。于中差大差回道。御史內揀用。限以一年。不得更差。使之看詳刑名。檢閱章奏。一振士氣。糾察之任。風紀所關。宜試事考言。察微詢著。慎其始進。責其後成。倡直言敢諫之風。抑貪昧渙忍之陋。一銷勘合。今後凡奉有欽依勘合。務要刻期完報。若係司道延遲者。撫按官參究。巡撫官不依期完報者。科道參究。巡按官不依期完報者。都察院參究。一公激

揚。今後御史復命薦舉方面多不過六七員或三四員有司不過七八員或五六員薦詞止以四五句爲率不必長篇累牘應劾之人尤須先其大姦毋徒以州縣府佐等官充數。如有薦舉方行而旋以事敗官箴已敗而故爲容隱者考察回道之日奏請黜退。一慎防檢御史出巡原來卷扛須令有司檢點不得多增行李。鄉官往來止將廩米分送不得濫行饋遺。一懲貪酷係酷者照新例處治係貪者卽非枉法亦嚴行追贓押發各邊自行輸納完日爲民一端風化邇來以童生而叢毆郡守以生員而攻訐有司非毀師長連珠徧布於街衢報復讐嫌歌謠遂鑿於梓木宜行所在提學官申明卧碑嚴

加飭治疏入。上命務實舉行。兵部議覆飭武備事宜。其一議兵。祖宗朝九邊兵以百萬計。今尚存六十萬。有奇。其逃者。若能設法清補。原額亦可盡復。至于團練之法。當令各邊選編見在軍士。五人爲伍。五伍爲一隊。各立之長。長各擇敎師。敎以武藝。其一議食。冗兵汰則。冒替之糧減。主兵練則。客兵之餉省。我兵能戰而虜一遭剉。則必數年不擾。而行糧可免。虜旣遠遁。則我之威力能制屬夷之死命。而撫賞亦可罷。是足食之方。已寓於練兵之中矣。至於興屯鹽以復本色。視豐儉以爲折支。又在戶部酌議施行。其一議將。言將才難得。亦難任。今邊臣莫肯效死者。弊在操切太過。爵賞太輕。請令督



撫兵備官。一切閭外之務。悉聽總兵而下。自擇進止。不得拘以文法。其一議選擇邊吏。言各邊守令。務得真才。其一議團練鄉兵。凡沿邊郡縣。不分城市村堡。軍餘民舍。皆列爲鄉兵。如邊軍隊伍之制。各不防農。務隨時訓習。遇有虜報。移檄郡縣。轉相告諭。各率鄉兵。乘機防守。賊退而鄉兵有斬獲者。仍照軍例陞賞。雖無斬獲。而防守無失者。亦量犒之。其一議守城堡。言虜賊臨牆。不能拒之邊外。則當急入收堡。而邊內城堡。又不能盡守。則當擇適中之處。將附近小堡。併入大堡。修城浚濠。務得堅固。其軍民有自願包磚者。聽亦量助之。其一議整飭京營。言祖宗設立京營。屯兵數十萬。歲久逃亡者衆。

見存僅九萬餘人。中又多四方竄籍之人。有以一人而應三五役者。卽春秋操演亦虛文耳。今宜盡數報冊。有名者行衛查補。無名發單清勾。兵數旣足。仍行戎政大臣從實錄操練。季終會同巡視科道官視勤惰以聞。至於大閱之禮。宣宗嘗行之兔兒山。英宗嘗行之北郊。又嘗行之西苑。望自隆慶二年爲始。於季冬農隙之候恭請聖駕親臨校閱。一以甄別將官。驗其教練之多寡。以爲黜陟之次第。一以考較軍士。視其技藝之高下。以爲賞賚之等差。但有老弱卽行汰易。上曰然。大閱旣有。祖宗成憲允宜修舉。兵部宜與戎政官先期整飭。俟明年八月內來聞。餘悉如議。務實行之。戶部覆

議固邦本。言用財當經理者有十。其一言兵餉之費。倚辦屯鹽廢弛未可遽復。稍倣漢法。民願得爵及贖罪者。皆令人粟於邊。其一言貴豪隱占人丁。逋負租稅。一切重役。悉苦貧民。而吳中尤甚。宜敕各巡撫官。申嚴法紀。禁戢豪強。期以賦役均平。毋有偏累。其一言驛遞勘合。詐冒數多。宜加檢察。各處坐船。撫按官不得過二隻。外官方面以上。京官科道部寺行中書以上。方許乘坐。餘悉禁之。其一言各府州縣。送迎上司。不得額外增編皂卒。及靡費供張。其一言士民服用僭侈。當痛繩以禮法。其一言勸課農桑。令崇本業。其一言各省錢糧。請置格眼號紙。歲終類報。布政司類報本部。以此別其才否。

其一言京衛軍士及順天府食糧孤老多虛冒者宜悉查汰其一言奸滑軍民有將田宅投獻王府者宜行有司驗契追奪募民佃種收租以補祿糧其一言各省進解錢糧多被奸徒攬納以致侵欠宜令巡視科道等官嚴法嚴戢。上命從實舉行。

九月鑄給鳳陽管倉主事關防。工部尚書雷禮引疾乞休許之。

禮言本部上供錢糧已經奉 詔節省而爲太監滕祥所持危言橫索事事掣肘嫌隙旣成事體相悖乞早賜罷以全國體。上覽疏不悅令致仕去然禮在先朝以土木容悅致通顯。上初卽位攻之者甚衆及是自

知不滿于公論。故以事忤中官求去。挾詐沽直。非大臣去國之道也。

十月。都御史劉光濟奏以袁州府屬沒入嚴世蕃田土克南贛軍餉。從之。

并請寬租額。歲徵折穀銀六千四百餘兩。五年九月。命以變賣嚴世蕃田產銀兩輸江西南贛二軍門克餉。革南京太僕寺少卿一員。

遼王憲爌有罪。削爵降爲庶人。禁錮高牆。

國初洪武中。遼簡王植始封于遼東。永樂初。改封于簡。王子貴煖嗣。六傳至憲爌。性暴虐淫縱。惑信符水諸奸黠。少年無賴者多歸之。恣爲不法。隆慶元年。以湖廣

巡按御史陳省給事中張鹵先後論劾追奪嘉靖中所  
賜真人名號金印及祿米三分之一既而巡按御史邵  
光先復上疏數其十三大罪侍郎洪朝選等奉敕往  
勘具得其實章入上下禮部會同多官雜治革爵禁  
錮削除世封

操江都御史吳時來奏請汰簡水兵以甦民困從之  
時來言京軍之外因倭患增募水兵六千餘人宜量  
一千七百餘人分守要害餘悉罷遣諸郡舊徵兵餉銀  
兩並免編派兵部覆議冗兵旣汰而中軍把總等冗員  
亦當查革詔曰可

十一月獨石邊外三百里襲擊虜騎于長水海子

令江西南贛撫臣劉光濟張紳協議萬羊山寇剿撫之策  
江西萬羊山跨連湖廣福建廣東之地舊稱盜藪各省  
商民嘗流聚其間以種藍爲業是年六月山賊出劫鄉  
民羅萬家會南贛巡撫張紳初任遂令萬安營守備董  
平督兵往捕之兵至因聲言搜山諸藍戶大恐遂拒敵  
官兵江西撫按劉光濟檄分巡湖西道撫諭以紳  
令追捕益急巡按江西御史顧廷對遂奏藍戶未必皆  
盜不宜激之生變紳勇於任事不能與光濟協謀故紛  
紛至此兵部覆請令光濟紳協議撫剿之策毋各偏執  
已見以致誤事從之

令議處恩蔭陞遷

吏部奏恩歷官員故例仕至宗人府經歷順天應天二府治中俱得轉遠方知府其次者亦宜量陞閒散衙門如五府都事得陞兩京太僕寺寺丞如宗人府經歷及順天應天府治中得陞鹽運司同知既陞之後如在任無過寺丞一考得陞部屬職銜填註中書科辦事再加三考得加服俸運同得薦陞至運使及行太僕苑馬寺少卿間亦得陞布政司叅政得 旨依議行

命錦衣衛逮閒住太監李芳

杖八十送刑部獄監錮待決尚書毛愷言芳供事內廷日久今一旦坐死罪狀未明疏入 上以芳在內事上無禮第命錮之蓋芳數以直諫忤旨故也



十二月都給事中魏時亮上三事

一曰先憂言今天下可憂者在民瘼能爲民紓憂者在郡守今宜慎重其選果有治行超卓者卽陞兩京京堂或徑轉巡撫都御史以示旌異一曰養才言各省提學官須擇學行兼優者任之不必限以三年五年俟其資深望重或徑陞祭酒或量改翰林一曰久任言內外官有能修舉職業者宜一切久任不必數易以滋煩擾吏部覆前二事當如亮議其久任之法不能盡行宜先將職務緊要如祭酒巡撫左布政兵備提學及守令有聲稱皆久任之資望既深仍量加職級以示風勸議上從之

詔立雲南武定軍民府儒學

江西巡撫劉光濟奏行一條鞭法

一條鞭法者通府州縣十歲中夏稅秋糧存留起運額若干均徭里甲土貢額募加銀額若干通爲一條總徵而均支之也有徵收不輸甲通一縣丁糧均派之而下帖于民備載十歲中所應納之數于帖而歲分之縣納之官其起運完輸若給募皆官府自支撥蓋輪甲則遞年十甲克一歲之役條鞭則合一邑之丁糧克一年之役也輪甲則十年一差出驟多易困條鞭令每年出辦所出少易輸譬則十石之重有力人弗勝分十人而運之力輕易舉也諸役錢分給主之官承募人役不得復

取贏于民而民如限輸錢訖閉戶卧可無復追呼之擾夫十年而輸兩固不若一年一錢之爲輕且易也人安目前孰能歲積一錢以待十歲後之用者又均徭法通州縣徭銀數不可得減而各甲丁糧多寡勢不能皆齊丁糧多則其年派數加輕丁糧少則其年派數加重固已不均而所當之差有編銀一兩而止納一兩者有加二加三加四五六者有倍納四五倍納七八倍納者甚且相什伯則名爲均徭實不均之大者今合民間加納之銀俱入官正派之數均輕重痛苦樂於一縣十甲之中役人不損直而徭戶不苦難固便如金銀庫革定名徭編之舊照司府例納銀爲募人工食費止令巡守不

與支收其收之委之吏則毫末承稟于官需索者不得行而誅求者自歛又以時得代不久若查盤更有身役固不得竊庫銀而逃今石中斗給於舊有募充親充償折耗固當而募人爲看守其耗折亦徃戶自償彼守而此償適教之使盜也今募吏克歲加脚費而折耗責之勢不敢自盜又年終而更無歲久浥爛之憂又甚便諸逋運夫馬俱官吏支應勢不得多取卽用之不敢濫諸不可悉道其大都徵附秋糧不雜出名目吏無所措手人知帖載每歲並輸可省糧長收頭諸費利固不可勝矣諸上議具載王參政宗沐所爲均書中事累歲未決嘉靖末都御史龐尚鵬奏革天下郡邑庫子而都御

史周如斗撫江西力主條鞭議上之民喁喁望會卒官民巷哭甚哀光濟繼之奏可下通計里甲均徭驛傳民兵以隆慶初盡六年爲率計合用銀派之名四差皆視戶丁糧爲差次里甲一丁抵糧一石均徭三丁驛傳民兵四丁乃抵均徭驛傳民兵皆得以秩役優民里甲不免以里甲爲差隆慶萬曆間天下初更倭移廣寇如新出湯火而國家嚴綜核於任官舉二百年官方民隱積重難反之勢一舉而輕之滌積垢如釋重負而烝民洗然一新也議者以爲通十里以編不分年則丁糧均法當優免者勢不能分數戶以僥倖則濫冒消覈實數以編銀則倍累息合銀力二里左併公私諸費則名目簡

富人不近官役人不坐名則覬覦寢官給銀於募人而募人不得反覆抑勒則市猾屈去頭戶賠戶之派則貧富平糧有多寡役無輕重毋需花分毋爲詭寄則冊籍清蓋媮快至於此然唐楊炎以大曆中科率爲夏秋二稅宋王安石變差役爲免役助役錢業前行之矣方兩稅免役法及國初賦里甲錢具嚴法外科率之禁乃事久而弊今天下理大物博四差編派諸目視國初里甲業且增十倍矣夫極盛熾豐之候輕重正反詎逆其流激所極哉官之役民與民役於官猶臂指然安所得解異時所役坊里長糧長獨其名罷耳而里甲之直年經催之部運誰實貸之方法嚴令具時上必以節

約爲程督。下必以省用爲功能。故差逾于往耳。法久且弛。內有不得已之公費。外有不敢抗之求取。將於何取之。必將陽諱其名。陰用其實。外縮其數。內浮其出。求壓而已矣。夫人情重于用已之所有。輕于用人之所有。今差銀輸官。久且輕用而易費。費盡已。卽有部派軍興。諸率然之務。將於何取之。久且益重。獨里甲銀。通十歲派編丁糧。適均無多寡。法最善。豪富民差用。將自寬然。細民歲納毫末。吏恣留難。初置櫃。民自輸官。故視驗收。貪吏逮輸者至。稱欠數。責之完。罰懲之。而秤頭之羨增。吏收下戶。差銀秤欠銀一分。若九釐。註之簿。後復勾擾。而數少易抑勒。有完至倍徙者。蓋省郡城有監司守。民易

以自通得以法守自解免他僻遠邑去監司守遠吏得恣睢民不易赴愬又山谷民畏事而憚官雖條鞭行坊里日祇應如異時獨易十二總稱八班改值月日值日條鞭法下僅十餘年所而里甲費業已如嘉靖中年時嗚呼法安可專哉蘊隆之蠹譬則鼠穴潰決之端慎諸蟻孔後此且十百年於却慮豈有極哉識時者曰吏各追時爲理今安能逆防他日流激所極而不亟疏爬之不其然乎以是知參辟刑書古以救世而聖哲之主明察之官忠信之長慈惠之師儀式刑文王之德以日靖四方固長人者所以及子孫也善平均書推言之曰法無皆利者無皆弊者得其人則皆利失其人則皆弊語



曰斷而後行鬼神避之。今欲聚禱而謀一定百利之法生民而來無是也。

隆慶三年己巳正月乙巳朔

南京兵部尚書趙大祐卒

大祐爲人博大和雅勤於政事歷官中外俱有能聲。上改元初言官咸稱其德器才猷足堪重任而大祐病竟不起時論惜之

練兵都督戚繼光疏論薊鎮事宜

光言鎮兵雖多亦少之原有七不練之失有六雖練無益之弊有四何謂雖多亦少薊兵不習戎事而好末技壯者役於將門老弱僅以充伍一也邊關逶迤旣鮮驛

通使者絡繹將士逢迎是叅遊爲驛使而管堡皆傳舍  
二也賊至則調遣無法遠道赴期卒斃馬僵不救干事  
三也達軍邊軍之戍邊者散漫無統約束不明行伍不  
整四也臨陣馬軍不用馬而反用步五也家丁盛而軍  
心離六也乘障卒備多而力分七也何謂不練之失蓋  
虜之所至無常諸將不能分守隨禦恃乘障卒耳然恩  
威號令素不足以懾服其心分數刑名素不足以稽齊  
其力故緩急難使一也有火器而不能用二也棄土着  
而不練三也入衛之卒嫖于非屬無有紀律四也順天  
之班軍民兵四萬人各一心五也將以驍勇爲上然驍  
勇者一人敵耳將旣不練何以練兵方今注意武科多

方保舉似矣。此選將之事。非練將之道六也。何謂雖練無益。夫射打者。軍中之事也。今者徒有虛聲。而實未中的。且不知兵法。長以衛短。短以救長之數。一也。三軍之士。各專其藝。金鼓旗幟。何所不蓄。今皆置而不問。二也。弓矢之力。不強于賊。而與賊共之。三也。教練之法。自有正門。笑觀則不實用。實用則不笑觀。而今無其實。四也。臣又聞薊之地有三。平易交衝。內地百里以南之形也。半險半易。近邊之形也。山谷仄隘。林薄翳翳。邊外之形也。虜入平原。利於車戰。虜在近邊。利於騎戰。虜在邊外。利於步戰。三者迭用。乃可制勝。乃邊兵惟習馬耳。未開山戰谷戰林戰之道。惟浙兵能之。臣發跡浙江。思用浙

人願陛下更予臣浙江殺手三千。鳥銳手三千。或於西北召募。或就薊鎮摘取。須足馬軍五枝。步軍十枝。專聽臣統領合練。方今朝議紛曉。難於改絃。而臣擁重兵。易生嫌。二請設監軍科道官一人。以督臣庶。臣得展布而無掣肘之虞也。兵部請取回總兵郭琥而獨任繼光。監軍亦可無設。第以其事屬之巡關御史便。上是之。召琥還京。改繼光總兵官。鎮守薊州永平山海等處地方。奏內事宜除南兵勿調。餘悉下督撫官。詳議可否。以聞。於是薊遼總督侍郎譚綸覆議曰。繼光所論兵事。自練兵言。其說有二。一曰選區將。二曰設副將。自召募言。其說有五。一曰議班軍。二曰清查衛軍。三曰勾補逃軍。

四曰廣召募五曰議行糧議車騎合練可以用否臣綸  
議曰今薊昌二鎮所謂險地易地在在有之可練爲兵  
車七營十二路二千里之間有七營車騎相兼卽有數  
萬之虞無能爲矣議鼓舞犒賞兵車火器其費安出臣  
譚綸曰臣聞軍無財士不來軍無賞士不往繼光練兵  
犒賞請令每歲得支銀一千二百兩改設副總兵各二  
百兩不足則稍加原額勿令過侈使其可繼至于兵車  
火器已經工部給銀製造然尚未能克實數宜亦取盈  
於犒賞銀存者止數萬兩恐山西有司仍以去年免解  
故事觀望逋延宜以時趣納并將各衛所軍器料銀盡  
數畱之本鎮議七原六失四弊何以圖之臣譚綸曰繼

光所論兵多亦少之原內四事。如役占違例驛遞騷擾家丁偏重守險無要臣等皆得以便宜處分無容贅矣。惟定班軍無制事緒煩瑣當行督臣專疏議之。其臨陣調遣二事除督撫鎮守外各標下之兵仍限以日程事緩則騎兵晝夜須行一百二十里車步八十里事急則騎兵晝夜須行一百五十里車步一百里皆以調兵文到爲始其失期候事與遲卒探報不實者悉按軍法無赦。至於六失四弊一言以蔽之皆坐將不得人。今以繼光爲大將而臣等又議設副將擇區將則諸事可以次舉。惟在陛下精選而熟練之寬其文法使得自效耳。疏入下兵部覆議俱從之。

禮部尚書高儀等疏請東宮出閣講學

得旨待十齡來說

總兵馬芳請寢廕子爲田世威劉寶贖罪不許

石州之敗世威寶旣下獄論必至是芳有功廕一子千戶芳上疏言世威寶以千餘弱卒抗數萬方張之虜而狼狽致敗遂寘重典臣竊見二將才尚可用願寢臣廕子之命爲二臣贖罪御史王圻因劾芳恃公黨私兵部言石州之役總兵申維岳已伏誅而世威寶尚繫獄未決今芳以一念憐才之私冒昧上請誠如御史言宜戒諭芳令策勵供職而繫二臣毋赦上然之

工部尚書朱衡上節省議

內府監局一切加徵浪用則在 皇上親發訓辭俯容  
臣等隨事執奏。上是之因。命所司督逋省費悉如  
衡言。

戶部覆巡撫甘肅都御史王論所奏禁虛名寬虛稅二事  
虛名謂查盤委官抑勒官吏妄報附餘以獵能聲者虛  
稅謂有司丈量屯田多不親行止憑詢訪虛加稅糧以  
病民者二事有傷天和俱宜禁止。上是其言。

御史詹仰庇疏請慰問中官

仰庇巡視 皇城遇醫官自禁中出言 皇后遷於別  
宮寢疾危困疏請時加慰問得旨后侍朕多年無子近  
且病乃移居別宮冀稍安適却疾耳爾不曉宮中事多



言姑不究初仰庇疏上衆謂禍且不測仰庇亦自分重  
譴及命下中外聞者翕然稱聖德焉

左都御史王廷疏覆刑部尚書毛愷大理寺少卿王諍等  
議

廷言買休賣休律分列犯姦條下上承縱容抑勒通姦  
之條下接用計逼勒休棄之罪會意明屬姦情但律文  
止曰本夫婦及買休之人原無姦字故部寺各執所見  
大抵部則爲夫婦大倫不可輒賣當一切裁之以法該  
寺則以律用正條罪難槩擬欲將圖財嫁賣者問以不  
應量追財禮入官其貧病嫁賣及後夫用財買娶別無  
此情者不坐于情雖便頗屬紛更惟上加裁定得旨

買休賣休本屬姦條。今後有犯。非係有姦情者。不得引用。

二月南京國子監祭酒姜寶條奏飭監務以廣聖教八事。

一修理頽毀舍宇。一督徵各處膳銀。一請罷納粟事例以塞倖途。一催取舉人入監就中察其志行卓然者破格用之。因薦四川閬中舉人傅泰。內江舉人趙蒙古。可備學官之選。一請復國初積分之法。一公侯伯子孫例該送監者。盡數查明教養以儲大用。一處補分教屬官。以重課督。一查復祭酒司業見行舊例。及將監生物故者卹助。有犯者。別衙門不得擅自拘題。下吏禮二部覆

議俱從之。

復命給進表官勘合。勿予路費。

從御史李叔和言也。

駙馬都尉鄢景和卒。

景和性恬雅。好文。廢居崑山十餘年。被服儒者。既召用。時。時爲上稱引。祖宗視朝故事。多見採納。蓋戚畹之賢者云。

總督譚綸請築薊昌二鎮墩臺。

綸言二鎮東起山海關。西至鎮邊城。延袤二千四百餘里。乘障踈闊。防守甚艱。宜擇要害。酌緩急。分十二路。或百步三五步。犬牙參錯。築一墩臺。共計三千座。計每

歲可造千座。每座費五千金。高三丈。廣十二丈。內可容五十人。無事則守牆守臺之卒。居此瞭望。有警則守牆者出禦。所分之地。守臺者專擊聚攻之虜。一面設險。可保萬全。請下戶部發太倉三萬五千兩。兵部馬價一萬一千兩。以給工費。兵部覆綸所言。誠守邊便計。得旨允行。明年二月。綸上言。築城墩臺四百七十二座。規制精堅。可當雄兵十萬。爲邊境百年利。乞錄效勞將吏功。得旨。綸與劉應節、戚繼光等陞賞有差。

裁革南京遊兵都司。并三江會口。委用把總各一員。從操江都御史吳時來奏也。

三月。更名貴州新遷程番府爲貴陽府。

鑄印給之。

勒雲南總兵官黔國公沐朝弼閒住。

以其子昌祚暫領鎮事。候勘明承襲時。朝弼嫂陳氏復以疾爲辭。不願南行。又詔書召捕蔣旭等。不獲。事未及竟。撫按官陳大賓等。乃奏乞罷朝弼。令其子昌祚暫領鎮務。遣寧侯夫人張氏親至滇中。就陳氏辨驗情實。另行議處。於是兵科給事中張國言。兵部是其議。請革朝弼任。而以昌祚領鎮事。可否。侯上裁決。上以爲可。許。故有是命。

夏四月。總理鹽法屯田都御史龐尚鵬。請纂造會計錄。進

呈御覽。

言軍國之費與王府祿米較之。國初不啻數十倍。物力日蹙。民生重困。不惟陛下不能盡知。卽天下宗藩與百司庶府。或亦不及知也。乞敕戶工二部會查。祖宗時郊廟之享祀。內府之供億。監局之織造。歲時之賞賚。舊額幾何。今增幾何。王府之祿糧。百官之俸薪。衛寺之校尉厨役。京邊之兵馬。城池漕河之供給。匠作舊額幾何。今增幾何。至若各省軍民之賦稅。天下山河之鹽鐵。凡有關係國家經費者。各括其總目。照欵類開。貴在簡明。不用煩瑣。仍申言歲入幾何。歲出幾何。題曰隆慶某年會計錄。進呈。御覽時。或有所增減。各于項下改填。每季刊刻成書。照常封進。伏望皇上朝夕置之。

座右并頒行各王府及內外衙門使君臣上下共知國用之誦民力之窘務求所以樽節而變通之疏下戶部議聞。

鑄總理練兵關防給總兵戚繼光。

五月陞編修王錫爵爲南京國子監司業。

廣東官兵擒叛將周雲翔等以捷聞。

先是海賊曾一本勾引倭寇犯廣東破碣石甲子諸衛官軍禦之無功耿宗元御下素嚴及是聲言欲斬敗將周雲翔廖鳳曾德久廖廷相雲翔等大懼乃謀作亂會宗元閱兵于教場雲翔等忽鼓躁躍起手刃宗元殺之執通判潘槐以叛遂與賊合已而潘槐自賊中誘奪

鳳獻之巡撫都御史熊桴所桴具以聞給事中張鹵因劾桴解紛無略原任總督張瀚候代未行坐視不省及總兵郭成逗遛潮陽按察司張子弘監督無狀乞并議罰得旨瀚降一級聽用桴等俱任俸戴罪剿賊時雲翔等亡入賊巢賊屯兵平山大安峒等處入掠海豐縣從鹿境渡河會總兵郭成等方率兵進剿而南贛巡撫張珣亦遣參將蔡汝蘭等兵至于是共趨大南白雲屯以入平山夾攻之凡月餘各部兵擒斬一千三百七十五人內生擒其倭酋一人從倭一百餘人奪歸被虜通判潘槐而下六百餘人叛將周雲翔潰圍出走成部卒擒之捷聞上命陞賞有差



廷杖御史詹仰庇革職爲民

仰庇言臣近查內官監錢糧如各庫廩及房租地租一切糜費動以御前供用爲名除入私橐乞命戶工二部及巡視科道月備查應留應革及出入多寡之數以杜奸欺再照陛下前取戶部銀乃盡以供造鰲山修理宮苑等費使羣小得因而乾沒爲聖德累上怒責仰庇悖逆狂妄累次不悛命錦衣衛逮至午門前杖一百爲民

禮部尚書高儀覆議儀制郎中戚元佐所陳宗藩事宜元佐言方今宗藩日盛祿糧不給不及今大破常格早爲區處則將來更有難處者昔高皇帝衆建諸王皆

擁重兵據要地以爲國家屏翰比固一時也。迫靖難以後防範滋密兵權盡解。朝堂無懿親之迹。府僚無內補之階。此又一時也。今則人多祿寡支用不敷。仍有共蓬而居分餅而膳四十而未婚二十載而不娶。強者劫奪于郊衢弱者竄入于輿皂。此又一時也。嗣是而後驕侈漸盈間作不典。法多園土之收。辟有勒盡之慘。此又一時也。夫高皇帝草創之初利建宗子。文皇帝靖難之日思鑒前事。用意不同各有攸當。至列聖以迄于今時移勢改思以義裁其分其理自有不能曲盡者矣。國初親郡王將軍纔四十九位女纔九位永樂間雖封爵漸增亦未甚多也。而當時祿入已損于前不能全

給今二百年。宗支入玉牒見存者二萬八千四百九十二位。視國初不啻千倍。卽盡今歲供之輸。猶不能給其半。況乎十年之後。所增當復幾何。又將何以給之。議者謂祖制不敢擅更。不知法窮則變。變則通通。則久且國初親王之祿五萬。他段絹茶鐵等用亦復萬計。然不數年而止給祿米。又不數年而減爲萬石。又不能給而于代肅遼慶寧谷諸王。且歲給五百石。是高皇帝令出自已。而前後之言已不符矣。永樂間祿數日殊。秦魯唐府各五千石。遼韓伊府各三千石。肅府僅七百石。慶府雖七百五十石。而郡王常于數內撥給。是文皇去國初未遠。而祖訓之文亦不盡守矣。况親王出城歲

時訓練蒐兵講武。祖訓也。而靖難以後。則寢之。郡王子孫一體任用陞轉。祖訓也。而累葉以來。皆無之。則高皇祖訓。列聖已難悉遵行矣。其在今日。事勢逾難。尚可膠柱以調瑟乎。臣不揆狂陋。敢僭擬五事。上請。惟陛下裁擇。一。限封爵。查得嘉靖中。議者請行限子之法。而先帝未允。臣謂生子不必限。封則可限。今國朝歷世二百餘年。以親論之。亦遍隆矣。除初封親王。姑照例襲封侯。三世而後。再加詳議外。其累朝所封宜立爲限制。如親王嫡長子。例襲親王矣。嫡庶次子。許封其四。共五位焉。郡王嫡長子。例襲郡王矣。嫡庶次子。許封其二。共三位焉。鎮輔奉國將軍。有嫡子。許封其二。無嫡

子止許以庶子一人請封鎮輔奉國中尉不論嫡庶許封一子以上各職襲如有生子數多不得盡封者照舊請名有志讀書者與民間俊秀子弟一體入學應舉登名科甲者一如王親事例止作外官其他力田通工等業從便生理可也如慮其力不能謀生宜量爲給貲親王之子不得封者年至六十賜之冠帶給銀六百兩郡王之子不得封者有志入學賜之衣巾與各子俱給銀一百兩則或仕或不仕咸可無失所之虞倘其中更有遊蕩廢業者則譬諸家有不肖之子亦付之無可柰何而已或曰如此則擅出城郭如國之明禁何哉然臣嘗稽之祖訓並無禁出城郭之文蓋爲近日放縱不法

者設也。苟能各務生業，謹守王度，一有不檢，稍加繩之，雖出城何害？或曰：宗室有罪，例不加刑。今入仕失職，與交易，憤爭將刑之乎？亦一切貸之乎？臣謂宗室不加刑，責原非古道。夫人情有欲，所以平其情而不亂者，特法耳。今宗室有過，不治以有司，是導之亂也。且聞今之貧宗，傭工隸卒，無所不爲，匿名執役，甘心捶楚。若顯拔縉紳之例，而巧受舉劾之公，分授四民之業，而平以市官之法，此大公至正之道。何辱之有？一議繼嗣，查約郡王無嗣，止許本支奉祀，不得援兄終弟及之例。近已申明，人知共守。惟親王尚得以親弟、親侄繼襲，臣愚以爲親王之得封，謂其爲天子之次子，故崇之以體貌，不使與

兄弟行輩大相懸絕。且夫子孫相繼世。富貴固不必言。但至乏嗣。則統緒已絕。卽以本支奉祀。使香火不泯。亦已矣。而何爲又使親弟親侄繼襲其爵哉。請自今有絕嗣者。止推一人管理府事。不得冒請復繼王爵。以別疏屬。查得國制郡王六世孫以下。世授奉國中尉。夫奉國中尉之職。自親王而推。則七世矣。自郡王而推。則六世矣。卽自奉國中尉而推。世世不改。則與國終始。將萬世矣。臣觀祖廟之制。親盡則祧在。祖宗且然而于卑屬。乃祿及祖免以下。不倒置乎。今後奉國中尉授封。再傳而下。不必賜封。止將所生第一子。給銀一百兩。使爲貲本。傳至五世而止。其餘悉聽自便。一議主君查得郡

縣主及郡縣鄉君隨父之差等請封初不限其數之多寡今男封既有限制合將親王之女止封其三郡王之女止封其二將軍中尉之女各封其一主君之祿俱各照舊外其選配儀賓既有職事誥命列之官階足爲榮寵合將俸米免給以上各女有不盡封者仍各給以婚資使爲贍用出自親王者給銀二百兩出自郡王者一百兩出自將軍者八十兩出自中尉者五十兩選配之婿聽其自爲生理其應舉入仕者悉授外任宗女宗婿除以前者勿論外以後各女婿給銀五十兩之外不必另給冠服婚資一體聽其自便一議冒費查得冒妄子女擅婚子女革爵子女與一應庶人既許其各從生理



則口糧可以無給。但其間或有年長廢棄及家貧無業者。一槩論革。恐不聊生。合無將以前者俱各照舊外。自今以後所生之子。各宜預爲教訓。聽其從便生理。不必給以口糧。一議擅婚。查得宗室婚禮例。經本部再行覆請。方許成婚。今各府擅婚最多。皆不顯言其弊。假捏名色。人各不同。彼既不肯自首。而奏抄到部。必不能違例題覆。則一切立案不行。固其法之不得不然者也。夫各宗路于例。而無由伸其願。臣等拘于法。而難以徇其情。乃有老大未婚而饔飧不給。種種苦抑。不可勝述者矣。今莫若使各宗自首。明言其爲擅婚之子。照舊給以本等口糧。士農工商仍聽自便。以後生者止許賜名。不必

再給口糧聽令從宜生理庶宗室有資生之路而國家垂永久之圖矣疏入上下其章禮部尚書高儀言元佐所奏鑿鑿可行但事體重大臣等不敢擅議請通行各王府將奏內事理虛心評議務求允當條列以聞容臣等再會廷臣熟議上請宸斷施行上從之

戶部奏預開四年分各邊鹽課

共一百二十萬五千三百一十四引常股兩淮四十九萬三千六百二十六引兩浙三十一萬一千三百三十八引長蘆一十二萬六千五百六十五引山東八萬六千一百一十引有奇存積兩浙一十三萬三千四百三十引長蘆五萬四千二百四十二引有奇派中各邊俱

用常股其肅鎮兩淮八萬八千九百引。兩浙一十五萬五千引。計銀七萬一千五百五兩。延綏鎮兩淮八萬四千四百九十八引。兩浙七萬四千三十九引。計銀六萬八千一百六十二兩。寧夏鎮兩淮五萬九千四百八十六引。計銀六萬一千五百九十三兩。宣府鎮兩淮一十萬四百四十一引。長蘆六萬三千五百四十二引。計銀六萬二千九百二十兩。大同鎮兩淮五萬一千三百六十五引。長蘆三萬一千五百引。計銀三萬一千九百一十二兩。遼東鎮兩淮四萬三千三百六十八引。山東四萬二千五百引。計銀二萬八千九兩。固原鎮兩淮一萬九千五百一十四引。兩浙七千引。計銀一萬二千二百

七兩山西鎮兩淮三萬九千七百四十六引兩浙三萬四千二百九十九引山東四萬三千六百一十引計銀三萬八千四百一十九兩薊州鎮兩淮六千四百四引長蘆三萬一千五百二十三引計銀九千五百六兩以上引價兩淮在各鎮俱五錢惟甘肅者四錢五分兩浙在各鎮俱三錢五分惟甘肅者三錢長蘆俱二錢山東俱一錢五分外兩浙長蘆存積鹽俱各運司開中以備發邊支用

六月兵部尚書趙炳然卒

炳然歷官中外三十餘年清勤練達所至有聲其巡撫浙江時會百姓新罹兵燹炳然悉更舊令不便者仍奏

減軍需之半。以業貧民。浙人至今思之。

閏六月。

七月命工部造朝殿掛燈及鰲山燈。

工部執奏。今災異頻仍。旱蝗水溢。宜停止興作。以應天心。又明年日月之食。皆在歲正。陛下方當恐懼修省。何暇爲觀燈遊宴之舉。即謂朝殿掛燈不可缺。則因其敝壞稍加修葺。取該監錢糧足矣。上乃罷鰲山而令更新朝燈之敝壞者。

太常寺卿陳慶請申明部寺職掌。

慶謂本寺非禮部所屬。何得擅主裁革。司官公移。安得不署名。禮部言以本部理太常之事。爲侵擾。則戶部之

于錢糧兵部之于士馬皆爲侵擾矣疏並下吏部及是吏部覆言太常所掌乃祠部一事固不可槩謂部屬亦難謂全無統屬其公移往來宜各仍舊上從之致仕禮部左侍郎瞿景淳卒諡文懿

爲人醇謹以孝行聞歷典試多獎拔士論稱之

令沐昌祚爲都督僉事暫克總兵官鎮守雲南

御史劉思賢以爲不便行事故也

刑科給事中魏體明條陳五事

一懲酷刑一慎議讞一戒淹滯一省詞訟一禁廠衛其戒淹滯言有司牽泥成案憚于平反又多引嫌却避卽在重辟心知其寃而莫爲伸理至發遣之類更相積滯

動經數年。宜行戒飭。其禁廠衛言番校緝獲盜賊不問真僞。以榜掠定之。箠楚之下。何求不得。銜冤茹痛。莫此爲甚。自今宜送法司鞠審。如情真罪當。乃與紀功。其濫及無辜者。卽時疏釋。仍罪反側者。刑部覆奏。得旨。淹禁獄囚。在外者。行所司速爲伸理。在內者。法司具以名聞。

八月。錄平閩廣巨寇曾一本功。

劉燾左都。涂澤民熊桴俱右副都。廕一子入監讀書。督撫如故。俞大猷右都督。李錫郭成俱署都督同知。餘各陞賞有差。

罷東西巡關御史。令巡按御史兼領其事。

令趙貞吉入內閣辦事

諭釋田世威劉寶二將死罪

二將以山西石州失陷論死繫獄上忽傳諭所司釋之俱克邊衛軍令立功自贖蓋三輔臣意也

給事中宋良佐言巡青所見聞有四端

牧軍勇士太濫草料侵冒太甚牧場地租多逋戶部止以牧馬地租不必奏差主事管理其他革弊事宜皆如良佐所奏又言御馬監太監高相等以御馬舊制非外所得與然會典云御馬監芻糧官爲置場收納是隨地創設何常分內外哉惟陛下斷然以良之奏爲必可行相等之言爲必不可信奏上上命悉如舊行



大閱將士于京營教場

從大學士張居正奏請也是日 上戎服登壇軍容整肅六軍之士各效其能無敢誼譁違令者京師老稚莫不快覩稱慶以爲曠典云。

刑科右給事中許天琦奏刑獄之濫其原有六。

一則有司承上官意指殺人媚人一則傾任書吏因公行威舞文析律一則以贓罰爲名多受民詞而陰濟其貪一則干譽悅名之士務苛察刻深謂之風力雖心知其冤而莫之省一則威嚴恐喝令民誣服而不敢訴一則長吏教化不先使民棄仁誼而歛財利故獄訟繁興刑部覆奏報可。

十月裁革河南一省冗官

唐府崇府右長史各一員。開封彰德衛輝懷慶四府通判各一員。汴池縣縣丞一員。原武縣主簿一員。歸德汝寧南陽三府知事檢校各一員。歸德府睢州陳留封丘扶溝商水沈丘河陰泥水寧陵永城夏邑鹿邑虞城考城柘城十四縣儒學訓導各一員。汝寧府稅課司鈞州稅課司廣積倉大使各一員。

十一月令戶部奏聞納銀入數。

傳諭令奏元年以來入數。尚書劉體乾等具言先開後納銀一百七十二萬五千六百有奇。除已給邊餉外存者五十萬九千九百有奇。而各鎮年例未完尚欲補給。

上曰開納銀所以濟邊歲入尚不止此其十三省戶丁糧草鹽引稅課銀通計三年支用見存幾何具以數奏體乾等復言各項銀兩自元年以來已給經費凡九百二十九萬有奇存者二百七十萬有奇今補給各邊及官軍折俸布當用銀二十餘萬各邊年例當用銀二百八十萬計所入不能當所出上因問九邊年例軍餉太倉歲發及各省解納之數體乾等又言國家備邊之制在祖宗朝止遼東大同宣府延綏四鎮繼以寧夏甘肅薊州爲七又繼以固原山西爲九今密雲鎮昌平易州俱列戍矣其防守土馬各鎮原自有主兵一鎮之兵足以守一鎮之地後主兵不可守增以募兵募兵

不已增以客兵調集多于往時而坐食者愈衆矣其合用芻餉各鎮原自有屯田一軍之田足以贍一軍之用後屯糧不足加以民糧民糧不足加以京運饋餉溢於常額而橫費者滋甚矣府庫空而國計日詘田野耗而民力不支今日缺乏之故供邊之費固其大者因以元年太倉及各省歲發兵餉與本鎮屯糧之數備呈上覽。上曰歲發銀數甚多臣下全不爲國體恤其他弊端姑置不問。

南科給事中駱問禮條陳十事。

其一宜酌用羣言不執已見其二宜日御便殿非嚮晦不入宮闈其三內閣政事根本宜叅用諸司無拘翰林

其四風紀之臣當備員久任詔旨必由六科諸司始得奉行如六科不能封駁諸司失檢察者許御史糾彈益廣言路令匹夫皆得以自効其六臨朝決事毋使中官叅與其七議國事惟論是非不徇好惡其八朝廷渙號擬則必當言則必行以挽積弊之習其九面奏儀節宜省文求實務在易簡可行其十修撰編檢等官宜更番直日乘輿言動奏報直簡備書修爲日曆疏上上以其言狂妄命降三級于是吏部補問禮于南京國子監學正有旨改遷方用。

禮部尚書高儀四疏乞休上許之。

因南道御史傳寵論其叩壇請撰玄文科道請中官

還位。儀不申請。戚元佐條陳宗藩事宜。沮格不行。所指雖有未當。儀奏辨奉旨慰留。而儀終不安。故力求去也。以儀典禮効勞。加太子少保。賜馳驛歸。

陞按察使殷正茂爲僉都御史。巡撫廣西。

先是廣西以總督兼巡撫。後以廣東未寧。而廣西言因之變。尋起勢不能專制。于是議者皆言宜設專官督理軍餉。兵部以爲請詔吏部舉堪任者。以正茂爲之。

十二月。黜元氏縣典史張儀爲民。

儀以部糧至京。尋陞南京倉大使。意不能平。乃訐奏文選司員外郎滕伯輪營私不公。及僉都御史溫如璋。兵備副使何本序。真定知府陳奎。貢緣乞陞。狀上。以儀挾

私妄奏。下法司逮問。法司奏儀所犯宜編置口外。詔爲民。

刑科都給事中舒化等言屬廠衛密訪百官之非。不聽。

化言。祖宗設廠衛以捕盜賊防奸細。非以察百官也。駕馭百官乃天子之權。而奏核諸司責在臺諫。廠衛不得與。是以各司其事。政無牽掣。今以暗訪之權歸諸廠衛。萬一人非正直。事出冤誣。由此網及忠良。殃貽善類。是非顛倒。陛下將安從乎。且陛下既委之廠衛。廠衛必託之番校。此輩貪殘何所不至。人心憂危。衆目睚眦。非盛世所宜有也。惟上幸追寢成命。以一政體安人心。御史劉思賢等亦以爲言。上命俱付所司知之。

添錦衣衛冒濫官旗黃浦等

一千一百一十五人降革減替有差。從科道官議也。

起吏部右侍郎陸樹聲教習庶吉士。

吏部尚書楊傳致仕。

先是巡按山西御史邵永春論劾總理屯鹽右僉都御史龐尚鵬心術狡猾行事乖謬乞

賜罷斥。吏部覆議

尚鵬才堪策勵宜留用。上曰近來吏部不查各官賢

否應去應留專事掩飾敢爲欺詐。于是博上疏自訟請

解職。上以博旣引罪令致仕奪該司官俸半年。勅尚

鵬閒住屯鹽事務行各該巡撫官從實整理不必再差

起大學士高拱以原官不妨閣務兼掌吏部事。



按拱以青官恩以少師入內閣出筦吏部則與樞內秉  
大鈞顯兼萬層初張居正亦以青官恩入內閣身都師  
相代天言工天下震焉蓋職業崇于中書體統尊于  
公孤儼然周宰漢相上矣

命廷杖尚寶司丞鄭履淳繫刑部獄

淳言今之最急莫如用賢陛下恭默三禩寧曾召問  
一大臣面質一講官賞納一諫士忠言重折檻之罰儒  
臣虛納誨之功姬姜遺脫珥之規周召拂同舟之義回  
話旣懲趙普奚從而補牘內批徑出蘇轍何自以封還  
善類旣失于振揚厲階陰啟乎闕寺言涉官府輒肆阻  
撓梗在私門堅不可破伏願奮英斷以決大計勿爲小

故之所淆弘濟哲以任君子勿爲僻昵之所惑以美色  
奇珍之玩而保瘡痍以昭揚細務之勤而和庶政以蠶  
夷爲開門勁敵以錢穀爲黎庶脂膏拔用陸樹聲石星  
之流省納殷士僭翁大立等疏經史講筵臣民章奏必  
與所司而相可否萬幾之裁理漸熟人材之邪正自知  
察變謹微回天開泰計無踰此上以履淳假借陳言  
妄議朝廷懷奸生事命杖一百繫獄

降巡視御史楊松三級調外任

時尚衣監少監右少監黃雄者乾清宮近侍也嘗以眷  
休日私出徵子錢與居民鬪市中兵馬司捕繫之明  
且執送御史松所事不決而內監以雄不入直令校尉

趣之校尉詭言有駕帖召雄。松驗問無狀。乃劾奏雄暴橫不法。詐稱詔旨。雄亦自辯。不如松言。上以松奏事不實。不奉旨。輒拘係內侍官。命降調。而黜兵馬之捕雄者。爲民雄亦降三級。發南京吏科。都給事中鄭大經等。江西道御史王圻。各疏爭之。不能得。于是巡城御史俞一貫等言。松職在巡視。得糾察輦轂下不法。其論雄事。雖激然爲。陛下執法安民。非有他也。今松以一言輒出。則不惟臣等臨事掣肘。而風紀不振。善良不安。具于聖治。關係不細。惟陛下幸曲宥松。以光聖德。不聽。

降慶四年。庚午春正月。己巳朔。

命議定京營之制

大學士趙貞吉上言。我朝內外衛兵。分立五府。乃高  
皇帝定萬世太平之計。俾免前代強臣握兵之害。其爲  
聖子神孫慮。至深遠也。永樂末年。因聚府兵北伐。旋師  
之後。遂結團營團操。乃以三千神機二營附之。因號爲  
三大營。其實皆五府之兵也。夫五府之兵。因調發而聚  
之爲營。旣歸。卽當散運各府矣。所以久聚團操而不散  
者。以當時常有戒嚴征伐之事。故不暇耳。然猶以五軍  
各營。實未變五府之舊制也。沿至正統末年。營變爲十  
團營矣。弘治年間。又加爲十二團營矣。正德年間。又增  
置東西官廳矣。然舊營之中。尚存老家軍之籍。則五營

之號未泯而五府之意猶存也。至嘉靖庚戌嚴嵩建議于五府之外特設戎政府。括內外兵籍。鑄總督戎政之印而授之。仇鸞鸞誅而以鎮遠侯顧寰代之。營兵則日弱矣。臣竊謂分府設將之制未易卒復。而分營統兵之法猶可遵行。合無將見操官軍分爲左右中前後五營。各擇一將以分統之。責令開管訓練。各程其能。而以文臣巡覈之。加賞罰焉。收戎政府印歸之內府。有事則領勅拜印而命將于闕外。事完則繳勅納印而歸將于營中。如是則大阿之柄獨持于上而輦轂之下常有數萬精兵可戰可守。隨所用而無不宜矣。疏入。上令與廷臣從實會議以聞。久之乃集議東閣下。惟英國公張

溶等十六人請分營練兵如貞吉言。成國公朱希忠等二十八人請革戎政武臣與印。而仍用三大營。如都給事張鹵言。給事中邵廩及魏體明。御史尚德恒。仍各上疏言強兵在擇將。不在變法。兵部尚書霍冀以爲然。乃上議曰。法未至于大壞者。無貴于紛更。議有涉于異同者。當從乎衆議。今京營之制。總之爲三大營。以統其綱。析之爲三十小營。以理其目。兵柄不偏于一將。軍法不專于一人。有合操。有分操。有春秋閱視之操。有歲終考覈之操。此正皇上所謂分營練兵。係祖宗舊制。聖子神孫所當欽承而勿替者。况在廷文武諸臣多謂京兵之訓練。不在于營制之更張。而在于將佐之得人。

操練之如法。似皆探本之論。臣等參酌羣言。竊論三大營仍舊。則將領不增而占役少。號令不煩而統紀明。似屬穩便。至于大將不宜專設。戎政不當有印。此則防微杜漸。相應依擬。餘仍照祖宗三大營分營操練。內五軍營多餘二枝。均撥神樞神機。每營共爲十枝。推智勇將官三員充總兵官。各請勅一道給關防一顆。以便行事。而以文職大臣一員量加職銜。俾之總理。每歲無事。則居營訓練。有警則總兵掛印出征。事完回營。照例繳印。中間未盡事宜。聽新任督理大臣及巡視科道官逐項查酌。另行條議以聞。得旨。營制旣經多官會議明白。俱依擬行。

奔魏國公徐鵬舉祿米。革助教鄭如瑾尋勒南京國子監祭酒姜寶爲民。南京刑部尚書孫植誠意伯劉世延俱閒住。如瑾復職。

鵬舉夫人張氏早卒。無子。庶長子曰邦瑞當襲封。鵬舉愛其嬖妾鄭氏子邦寧。欲立之。先使人納賄嚴世蕃所。詭爲鄭氏請封。已而議遣邦寧送監習禮。謀于兵部尚書劉采。采以爲不可。鵬舉卒。送邦瑞。邦寧知事不就。乃函其金寶首飾。邀誠意伯劉世延于鷺峰寺。世延受之。密以書貽祭酒姜寶。寶疑不決。會有助教鄭如瑾者。故爲舉人時。頑薄無行。至是亦陰入邦寧賄。証世延語于寶。所寶遂戒毋納。邦瑞駁還。禮部行五府勘結禮。尚書



林燠怒不爲報。郎官王世懋陰佐之。而鵬舉因遂留邦瑞不遣。居無何。副使馮謙私候寶。盡發如瑾與邦寧相結約語。寶劾如瑾。章下南京法司鞫問。於是世延事亦發。反移牒至刑部。言已與徐氏世讐。未嘗與鵬舉廢立議。詞甚倨悍。吏不敢詰。惟如瑾坐革職爲民。鵬舉奪祿米一月。鄭氏追奪誥命。邦寧及其黨。法治有差。如瑾旣得罪。恨寶發其奸。乃密使邦寧黨。揚言寶與世延同受邦瑞賄。爲馮謙所詰。而嫁禍于瑾。以自解。於是南科王禎言。延受重賂於邦寧。而爲之畫策。寶受密語于世延。而爲之駁查。皆營私亂法。罪當首論。而刑部尚書孫植。訊報不詳。止坐一如瑾塞責。乞并罷。吏部覆請。令植寶。

世延回籍聽勘。後南京法司希高拱旨止坐寶。贓千金而爲如瑾辯雪。于是寶爲民植世延閒住。如瑾復官。然

令海瑞畱撫地方如故。

刑科舒化言瑞著節。先朝誠一代直臣。然迂滯不諳事體。科條約束。切切于片紙尺帛間。以難過客。恐非人情。如瑞第宜與兩京清秩。以風激天下之士。蓋所以全地方。亦所以全瑞也。得旨。海瑞節用愛人。勤事任怨。畱撫地方如故。

附錄內承運庫以空頭劄子傳諭戶部進銀十萬兩。部臣劉體乾執奏。京庫錢糧以片紙取之。無姓名印信。真

僞難辨臣責典守不敢發科臣劉繼文亦言白劄非體乞慎中旨以防欺蔽報有旨銀兩令如數以進

二月命大學士趙貞吉兼掌都察院事

魏國公徐鵬舉卒

南太僕少卿殷從儉上言禦獐之策採行之

從儉言廣西毒民惟獐而獐所畏服惟狼兵先年古田之寇雖時時出沒然未敢深入由防守有狼兵也頃歲議減狼兵置募兵已復盡革狼募二兵而用閩浙兵如捕鼠者易猫以犬然臣嘗講求禦之之法宜莫如調狼兵占地而責之屯守蓋土官以得地爲利而古田素稱膏腴尤其所覲覲也宜擇調東蘭那地南丹三州土官

令親領精銳狼兵各一二萬名。給以行糧資以嚮導。據古田要害。田畜其中。日夜探賊所往。遣謀購求。并剿勿赦。則首惡必盡成擒矣。又各獠村寨不下數百。種類不啻數萬。其中固有納糧向化者。亦有曾經爲寇。未與犯城。後能懼罪。願立長相統者。進兵之初。又當預發旗榜。分別良惡。使衆心知所向。背而不疑。然後一鼓下之。別立土官男。年力功勞相應者。查照左江九司事例。授以巡檢職銜。令其以夷治夷。屬之桂林府管轄。則今日之獠寇。卽他日之狼兵。納糧聽調。與編民無異。古田永無患矣。上採行之。

總督南京糧儲右僉都御史張鑑卒。

鑑以病篤乞歸許之未行而卒鑑爲人貌類朴野而節行高潔士論稱之

令兵部尚書霍冀致仕

先是大學士趙貞吉與尚書霍冀議營制不合會其鄉人給事中楊鎔論冀旨報留冀疑貞吉嫉之乃上疏言貞吉有四憾于臣乞罷臣以謝貞吉貞吉疏辯曰往臣爲嚴嵩所逐起官戶部四十餘日而尋爲張益所論罷益乃嵩之親嵩使劾臣於冀何與臣時以得去爲幸于冀又何憾大閱有期會近關虜警暫緩旬日尋卽舉行此時臣初入閣第附名疏末安得主之請釋二將意出三輔臣何至爲臣所誘趙肯失律本與主將李世忠申

維岳同而與副將劉寶田世威不合。臣據法持議。何憾之有。至於營制之議。與臣相忤。乃在近日。去銘論冀之時甚遠。臣何以預知冀不從臣議而先憾之哉。冀蓋自知賊私狼籍。不爲清議所容。而臣兼風紀之司。故勇於造無端之謗。欲俾臣與之俱去。臣備近臣。必待辯明。然後請乞骸骨耳。願將銘奏付法司嚴訊有無。上覽疏不悅。降旨責讓冀。令閒住而慰貞吉。

大學士趙貞吉乞休不許。

有詔勉留。而科臣張鹵、鄭大經、舒化等交章請罷冀而戒貞吉。言貞吉欲以銘奏付法司。恐非古大臣稱簞簋不飾之義。且尚書尊官。事非悖逆。原無究問之條。若言

官論人。一一逮問。殊非事體。於是貞吉求去益力。上手詔褒答。是日鎔辯疏。亦下置不問。

詔盡復夏言原官。仍賜祭葬。諡文愍。

致仕南京刑部右侍郎曾鈞卒。諡恭肅。

賜祭葬如例。贈刑部尚書。鈞爲人端嚴廉正。嘗劾武定侯助大學士嵩有直聲。入官垂四十年。始終一節。士論許之。

命應天巡撫海瑞以原官總督南京糧儲。

陞僉都御史朱大器爲副都代之。先是給事戴鳳翔疏論瑞每日開門受訟。動盈千紙。民間有種肥田不如告瘦狀之誣。至於散兵激變。則糧餉不敷。而取諸民壯之

工食議處驛遞則仇視過客將一應正文盡行革免禁佃戶不得完租貧民不得償債皆迂狂顛倒之甚不可一日居地方疏下吏部覆議言瑞志大才疏宜改授兩京他秩故有是命。

高拱請需才以待邊關之用上褒答如議行。

拱言宜于兵部添設右侍郎二員同額設侍郎協理部事平日則練習本兵政務或欲巡邊關務即以一人往旣便行事又不煩於假借或遇邊方總督員缺即以一人往人往旣可朝發夕至又不費于那移迨其出入中外閱歷旣深次第推補尚書員缺如此而猶稱乏用必不然也兵乃專門之學宜預養以待用法當自兵部司屬始



兵部司屬始宜特高其選。而以有智謀才力者克之。使專官于此。而又立陞格。如邊方兵備缺。卽以兵部司屬補。邊方巡撫缺。卽以邊方兵備補。邊方總督缺。卽以邊方巡撫補。而總督與在部侍郎。時出時入。以候尚書之缺。其他官中有特出之才。能知兵事者。又間取一二以補不足。如此而猶稱乏用。必不然也。臣又思之。邊方之臣。涉歷沙漠。出入鋒鏑。誠宜特示優厚。有功則加以不測之恩。有缺則進以不次之擢。使其功名常在。人先脫。或推奸誤事。則律以法。職任不稱。則左其官。使其功名常在。人後。如是而猶不盡力。必不然也。至于人力有限。窮則不支。臣又見邊關總督之臣。頻年累歲。常受辛苦。

斯其情亦甚苦矣。若使儲養有素，用不乏人，自可行通融休假之法。如其在邊日久，著有成績，則特取回部以休假之。休假之後，不妨再出，使其精神得息而不疲，智慧長裕而不竭，以勤王事，爲濟必多。且臣子馳驅之苦，旣在上者所深體，而君父體念之意，亦在下者所周知。君臣之義，卽同父子之恩，如是而人不盡心，必不然也。疏入。上褒答，並如議行。

三月，改操江僉都御史吳時來巡撫廣東。  
裁革南京冗官。

吏部驗封司主事一員，戶部雲南江西二司員外郎各一員，禮部儀制司主事一員，刑部四川司主事一員，工

部管繕司員外郎一員。都察院都事一員。通政使司右叅議一員。光祿寺少卿一員。國子監博士學正各一員。太僕寺寺丞一員。

裁革南京糧儲都御史。

以其事屬之南京戶部侍郎。仍設巡倉御史一員以佐之。

夏四月。以鎮平王府鎮國中尉睦榘爲周府宗正。

載堦趙府。宙楨唐府。載堦崇府。各如例從河南撫按官舉也。鄭府及方城萬安建德等官。宗室鮮少姑。以其教授領之。

諭行錢。但從民便。

從大學士高拱言也。

五月調原任南京操江右僉都御史吳時來外任。

初時來疏薦所部有司至五十九人吏科都給事中光懋等論時來濫舉市恩請調外任吏部覆可且禁自今陞遷及行取及任淺者毋槩列名薦中。

廷杖都給事中李已繫刑部獄。

已與給事中陳五德言近內承運庫太監崔敏等請買年例金寶臣等及戶部執奏停止俱不蒙俞允比者左右近習干請紛紜買玉買珠傳帖屢下人情汨汨咸謂陛下詔書不信無所適從臣竊惜之上怒已沽名犯上命廷杖一百送刑部監候五德黜爲民至八月刑

部尚書葛守禮等因科臣舒化等疏請而言朝審之時  
罪在殊死者奏請處決情可矜疑及有嚴密奏請未減  
再問獨內犯張恩等十人及都給事中李已原未定有  
罪名今收繫已久僅存餘息而朝審之時又不能與既  
不在矜疑之列又無復再問之條乞將恩等分別情罪  
輕重行罰宥已狂直放歸田里得旨已釋爲民恩等繫  
獄如故始法司意思等有內援欲借以脫已及已獨釋  
衆翕然謂上仁明獨斷左右不得與也

裁革廣東巡撫官。

改總督李遷爲提督兼廣東巡撫事先是給事中光懋  
言兩廣總督建置已久開府蒼梧坐鎮東西兩省居上

游之地勢若建瓴今更設二撫臣不惟多官多費適滋  
紛擾而於人情馳騁事勢牽挽尤爲多端蓋兩廣錢糧  
兵馬止有此數向嘗以一提督用之則有餘今以二巡  
撫叅之則不足况號令多門一遇有警輒彼此相仗宜  
革撫臣復提督便御史蘇士潤亦言之並下吏部覆可  
故有是命

命沐昌祚襲黔國公掛印克總兵官賜之制勅

雲南撫按官陳大賓等覆奏寧陽侯夫人張氏至滇中  
會沐朝弼嫡母李氏及嫂陳氏兩夫人于公館俱自愬  
年老多病仍願留滇終養其素助朝弼爲惡者惟蔣鑑  
未獲爾於是吏部以朝弼子昌祚襲職爲請上許之

朝弼罪如令執送蔣鑑自贖。

六月令邊方有司比內地官加等陞遷。

從掌吏部事高拱言也。薊遼則昌平順義密雲懷柔薊州玉田豐潤遵化平谷遷安撫寧昌黎樂亭延慶永寧保安自在安樂等州縣。山西則河曲臨縣忻州崞縣代州五臺繁峙定襄永寧寧鄉岢嵐嵐縣興縣靜樂保德大同懷仁渾源應州山陰朔州馬邑蔚州廣靈廣昌靈丘等州縣。陝西則固原靜寧隆德安定會寧蘭州環縣安塞安定保安清澗綏德米脂葭州吳堡神木府谷等州縣。此六十一處乃是邊方。其他雖係薊遼山陝所屬。不得槩以邊稱。徒資僻路。其各府佐一二在邊任事者。當

言亦同前議。入。上答悉如議行。

大學士李本奏復呂姓從之。

令遠方有司務得其人以克正官。

掌吏部事大學士高拱言廣東舊稱富饒之地近者民窮盜多皆坐有司不良所致。比往歲奉旨多取進士議者謂當於此等處克州縣正官之選或間叅以舉人嚴加考第毋容雜流遷謫者得肆于民上則地方猶可爲也其廣西雲貴近年亦有兵革之事議處有司亦當視此爲準。上從之。

原任巡按浙江御史龐尚鵬爲民。

降原任布政使李磐叅政薛天華按察使徐貢元僉事



王宇各二級坐尚鵬等在任時驗解段疋多粗紕不堪故也。

罷浙江提學副使林大春。

初大春患浙江剽竊乃以已意割綴經傳爲試題禮科左給事中章甫端論其謬妄故罷。

禮部左侍郎萬士和四疏稱疾乞致仕許之。

改謚大學士張治曰文毅。

治初謚文隱至是以湖廣撫按官稱其公忠亮直物望所歸而隱之一字乃違拂不成之義於治生平未協故有是命。

命錦衣衛逮北城兵馬指揮孫承芳杖出爲民。

時北安門有直宿校尉負一屍棄門外承芳見之疑有  
姦使使收繫鞫問辭連內臣李陽春陽春恐罪及已先  
奏言死者初入內時偃臥無急因念禁中非外人臥  
所故遣軍校扶出而承芳妄生事端擅加刑校尉當治  
上信之遂反坐承芳而釋係者勿問戶科右給事中查  
鐸等及刑科都給事中舒化等俱請以陽春所奏下法  
司驗問不聽

秋七月禁童奏浮泛鋪綴徒煩 聖覽者

從大學士高拱言也

戒諭有司慘刻用刑者

刑部尚書葛守禮等言我國家稽古制律例爲五刑笞

杖徒流死各有等則卽罪大惡極衆所共棄者猶問以刑部評以大理朝審以多官及至臨期又三覆五奏若不得已而後加刑焉今在外有司凡有訊鞫不論輕重動用酷刑有問一事未竟而已斃一二命到任甫朞年而拷死數十人者輕視人命有若草菅如汾州知州齊宗堯三年致死五十人榮河知縣吳朝一年致死十七人甚可駭也請行各撫按官如有仍前照例降級爲民有故勘故禁故入平人致死者依律抵死容隱者事發并治且律條具在義例昭然而各官素未講讀旣不知以律自治又安能以律治人宜依講讀律令條勅下監司以實舉行未仕如辦事進士各衙門堂官督令熟讀

講解仍不時考校務使通曉舉人監生待選於吏部者  
每遇考選摘取律文數條令其覆誦解釋以定銓選次  
第。上是其言。

始註選河南山東二省京糧道叅議。

吏部申議養病官員事例。

凡到部在三年之外雖稱三年內給文仍照違限罷職  
其三年赴部而又稱中途患病者照有疾致仕奏可  
革戶部尚書劉體乾閒住。

先是以內供不足數下戶部取太倉銀又令買金雲南  
體乾多執奏不卽奉詔。上以體乾數抗旨手詔勒  
閒住。

罷提督神樞營左都御史劉燾

以都給事中溫純發其通書賂遺故也

大學士陳以勤四疏乞致仕優詔許之

南京工部尚書林雲同引疾乞休疏凡五上許之

詔有司存問原任戶部尚書馬坤

坤時年八十餘矣

八月戶部尚書張守直請汰歲餉浮甚者

守直言臣嘗考天下錢穀之數計一歲所入僅二百三

十萬有奇而其中多積逋災免奏留者一歲所出京師

百餘萬而邊餉至二百八十餘萬其額外請乞者不與

焉隆慶二年用四百四十餘萬三年則三百七十九萬

其最少者而出已倍于入矣。近者遣四御史括天下府藏二百年所積者而盡歸之太倉。然自老庫百萬之外止二百一十萬有奇。不足九邊一年之用。自嘉靖十八年被虜以來。邊臣日請增兵。本兵日請給餉。蓋自五十九萬而增至二百八十餘萬。士馬豈盡皆實數。芻餉豈盡皆實用耶。臣不敢遠舉。第以近年一二鎮言之。如宣府之主兵一也在。嘉靖四十二年發銀二萬。後三年止一萬。乃今至一十二萬矣。大同之主兵一也。至嘉靖三十六年發銀二十二萬。次年二十三萬。乃至今二十七萬。又以加兵復費十一萬矣。舉主兵而客兵可知。舉二鎮而九邊可知。天下焉得不困乎。今卽不能如國初

故額亦宜考嘉靖十八年以前近規而汰其浮甚者且九邊去虜有遠近事有緩急豈必盡煩內帑然後足用宜令廷臣酌議減省不得過歲入常數之外臣亦移文督撫俾以歲用實數報部臣具籍以進惟陛下留神省覽其用財約於往昔者必忠臣也則有賞其糜費溢於故常者必非忠臣也則有罰一切出入許臣執奏上聞上然其言令各邊督撫從實議處以聞

築通州河西務城

九月改南京吏部尚書吳獄於兵部尋以病乞致仕許之詔先帝時建言被譴者毋得槩行卹錄

先是原任刑部主事唐樞在先朝以議大獄得罪故

吏科都給事中王俊民以議大禮得罪。上登極詔錄  
建言之臣。樞得復職聽用。俊民贈官廕子。至是浙江撫  
臣谷中虛以樞老請加秩致仕。而俊民孫秉禮適到部  
承廕掌吏部事。大學士高拱以爲非宜。人臣歸過。先  
帝反其所爲以行己之私臆。恐天下之人直以悖逆爲  
當然。願下閣臣議論告天下以醒久迷之人心。以開久  
塗之耳目。疏入。上曰。大禮斷自皇考。可垂萬世。諫  
者本屬有罪。其他建言亦豈皆無罪者。今乃不加甄別  
盡行卹錄。何以仰慰在天之靈。覽卿奏具見忠悃。諸陳  
乞並罷。吏部仍通行曉諭。自後有借例市恩歸過。先  
帝者。重論不宥。



御史張守約追論都督陸炳十罪。

炳當先帝時。結納嚴世蕃。竊弄威權。播惡流毒。世蕃既已就戮。而炳乃得保首領。以富厚遺子侄。宜追戮炳屍。逮治其子繹。侄緒家人佐。藉其家獄。既具。刑部乃上言。炳心懷悖逆。連結權貴。睚眦殺人。顛越取貨。擅侵戚里。搜匿家財。庄房田地。歲入萬計。珠寶金玉。動至數千。信王法所不容。人心所共憤。繹緒踵習餘虐。益肆猖狂。隱世蕃之賊。匿嚴紹庭於家。狡猾不道。繹緒宜褫職。炳宜會三法司議。開棺戮屍。削奪官爵。籍沒其產。追賊還官。諸疏內有名者。如炳弟太常寺少卿熿。宜革職惡黨。支琮等五人。宜永遠戍邊。陸顯等八人。宜杖徒得旨。炳

負國擅權播弄威福戕害無辜本當戮屍盡法第身故  
既久姑削其官職追奪誥命繹緒煇俱革職發原籍爲  
民餘如擬貲產贓物如數籍入紹庭發口外爲民佐邊  
衛永遠克軍

### 河決邳州

自睢寧白浪淺至宿遷小河口淤百八十里運船千餘  
艘不得進侍郎翁大立言權宜之計在棄故道而就新  
衢經久之策在開泇河以避洪水于是都給事中龍光  
御史孫裔興等皆以爲言請罰治河道諸臣責以後効  
令及時疏塞以通漕舟工部覆奏往時黃河自劉大夏  
設官布夫而河南之患息自近年改成新河而豐沛之

患息。非必河自順軌。由人力勝也。今既不能引他水以濟漕。而新衝之渠卒未可就。惟築決口。如曩時房村方略。則故道宜可通。至如泃口之議。雖工費不貲。而一勞永逸。比歲歲疏鑿。費亦自省。今大立躬自相度。調其利害。以聞。其管河官員俱令戴罪任事。俟河通奏請。上是之。

南京戶部尚書致仕孫應奎卒。

南京兵部尚書吳嶽卒。

歷嶽任南京吏禮兵部尚書。以考滿如京師。過家病卒。嶽居官清介。而質直簡易。有古風。士論重之。

詔祀故禮部尚書歐陽德於鄉。

時江西撫按官言德文章行業爲世所重其門人後學相與祠而祀之宜詔有司歲時舉祀以從人望禮部覆請上特允之

命以方士王金等獄詞宣付史館

掌更部事大學士高拱言近者審錄重囚閱方士王金陶世恩陶倣申世文劉大彬高守忠等獄詞謂金等妄進藥物遂損聖體比金等子殺父律謂先帝是金等所害使先帝抱不白之冤于天上留不美之名于人間伏望勅下法司從公再訊務見的確然後渙發綸音明其事於天下宣付史館明其事于後世刑部尚書葛守禮等奏金倣文彬世恩守忠習故陶仲文術左

道惑人。世文稱習兵書，亦非正術。俱應爲從論。第世文未冒陞賞，守忠入京未久，稍宜末減，發原籍爲民。金倣世恩、文彬例，編置口外，所流妻子應赦歸。詔如議。

詔復京營舊制

兵科都給事中溫純言：今京營之弊，其失在不擇將而添將，不增軍而增官，不講訓練而講營制。陛下奈何以一輔臣故而用三大將，以一勲臣故而用三侯伯，又以三侯伯而用三文臣，假令此六人盡才且賢，惟一心猶懼有十羊九牧之患，況一分兵馬，輒起異同，不惟文武不相能，卽文臣中亦自相矛盾矣。巡視京營御史王友賢亦極言新制不便，疏並下兵部覆。如純等言，請仍

用武臣一人總督文臣一人協理其副將叅遊分統皆如近議。上報允乃罷六提督更推總督協理大臣如故。

冬十月許加派江南兵餉。

初以應天巡撫海瑞議裁革江南召募客兵已而巡按御史張問明言各兵業有安居遣之適以滋盜乃復從議選留至是撫臣朱大器言蘇州常州松江共有主客兵三千六百有奇其餘水陸兵亡論主客共七千七百有奇勢不得盡遣而前所遣者仍以各處軍餘民壯調補合之蓋一萬五百六十五人又歲於防訊時募沙土兵八千是皆不可削計兵餉當用銀十二萬一千有

奇而存者僅五萬不能克一歲之給宜稍加派以安衆  
心事下兵部請留用官兵如大器言戶部議許加派兵  
餉銀三萬上報可

虜酋俺答孫把漢那吉率其屬阿力哥等十人來降

把漢那吉者虜酋俺答第三子鐵背台吉子也幼失父  
俺答妻一刻哈屯實鞠之娶壻比吉女爲之婦不相中  
那吉聘胡免捨金女欲婚之俺答聘我兒都司部女強  
娶之取免捨金女與之甘心焉那吉恚恨南走闌入關  
請降邊吏莫解以爲一胡雛於中國亡繫也總督都御  
史王崇古念以爲此奇貨可居於是豐館餼飭輿馬逢  
其意且以厚言宜尊顯之以示虜令俺答而急之與

則因與爲市。必繫送降人。必保塞奉要束。陽申其砥牘之愛。而陰制其命。卽俺答而不急之與我。因而撫納如漢匈奴質子事。使招其故部。居近塞。而逞足羈縻。俺答老且死。而黃台吉者立。勢不能盡有其衆。而吾以一屠耆谷蠡秩秩之。置塞外以觀其俯仰。舊存部落。勢必響應。黃酋聞其復反。勢必忿爭。其與黃酋媾我。則兩利而俱存之。其互相讎殺。我得因勢而制之外。不失與滅繼絕之名。而內收其力。此萬世計也。若循舊例。安置海濱。使抑鬱愁苦。彼不過一中國禁錮之囚。而俺答忿忿。侵擾邊不止矣。是時俺答老傷。孫突南走。計中國患虜歲入邊。必且甘心之也。則日夜泣目。盡腫。率衆南和。遷索



之邊臣言把漢那吉已部送北京乃予官職收養令欲  
取獨當乞恩懇求何得深入挾取是速禍也俺答聞乃  
引兵却出塞而遣使持菴文詣崇古請稱臣奉職貢求  
那吉還崇古要以盡繫諸外人爲主畫爲羽翼瓜牙者  
以來無得遣放是繫遯逆桀者趙全等八人以來易那  
吉

勅令南京禮部尚書吳山南京刑部尚書黃光昇致仕。  
是時山與光昇皆以時望起用方屢辭待命未卽之官。  
給事中韓楫等以爲遷延不敬請令山致仕而斥光昇。  
吏部覆議山等果病則人已殘廢亦難適用故並罷之。  
時謂楫專承望風旨以擊搏立威不復知朝廷進退。

大臣之體也

詔京營協理大臣設館教習勳曹以儲將材

從御史趙可懷議也

掌都察院大學士趙貞吉疏止科道考察

頃因御史葉夢熊奏論邊事言詞躁妄上干聖怒以

致嚴諭令因此一人遂被及諸臣并及四年以前衆心

洶洶人人自危科道諸臣其中豈無赤心報恩直言敢

諫之士今一槩以放肆欺亂奸邪不職罪之臣恐考察

之日所司奉承意旨過於嚴切未免忠邪並黜玉石俱

焚則將來言路壅塞士氣削沮傷國家安靜和平之福

也臣嘗考往古漢唐宋之事皆因鈎致黨人之罪一時

賢才銷磨殆盡致國空虛無以濟緩急之用而陵夷以至於不救我祖宗設立科道畀以言責或是或非尚有執政諸臣酌量可否取自上裁縱有不當亦止各受罰責以爲懲戒未聞羣數百人而盡加考察一網打盡以蹈漢唐宋之弊者也願收回成諭特加寬赦疏入上報已有諭

命肅府輔國將軍縉熾襲封爲王仍支輔國將軍祿禮部覆奏縉熾以懷王從父例不得繼襲此先帝獨斷皇上親裁且肅府初封甘州今徙蘭州在內地不得稱極邊卽選擇郡王賢者使理府事自足鎮護不必變更條例上不聽竟封王蓋太監陳洪入其賄爲與

援部議不能奪也

掌吏部大學士高拱請與都察院同考察京官

拱言京官六年考察皆吏部都察院同行惟丙辰春大學士李本掌部事考察科道奉旨專行都察院不與焉臣愚以爲耳目貴廣宜與都察院同事 上是之於是奉 旨與都察院科道官素行不謹者九人給事中鄭大經魏時亮周世選御史王漸主汝正劉思賢何其賢張櫓周希旦浮躁淺露者八人給事中陳瓚王謨劉東星岑用賓御史周弘祖耿定向尹校傳寵才力不及者十人給事中顧弘路戴鳳翔黃才敏御史王君賞趙巖周以敬王圻顧廷對張問明高甲得旨俱黜降如例

十一月大學士掌都察院事趙貞吉致仕

時吏科都給事中韓楫劾奏貞吉庸橫以議改京營爲變亂奏保嚴清爲欺罔請罷之貞吉疏辯曰臣五月內乞歸展墓未得方擬再疏今大學士以勤先乞骸骨無何又會虜警臣義不當求去今秋防事畢大祀禮成百工休沐計披烟誠辭未及撰而韓楫之論劾又至矣夫楫言官也其惡臣之深者直爲近日乞止考察科道一事與夫學士拱意不合蓋拱欲藉手聖諭以報復私憤故臣冒死陳請以阻其謀旣不得命卽至吏部同拱等考察兢兢焉惟拱言是聽楫謂臣極力救解恣意抵排者指何人考察之事甚密楫亦在考察數果何人

以此言告之乎。楫又劾臣爲庸橫。夫人臣庸則不能橫。橫非庸臣之所能也。臣往奉特旨兼掌院事。臣不敢辭竊意。上以拱權太重。故委臣以彈壓之司。與之並立。以分其權。此明君御臣之術也。今旣十月矣。僅以此考察一事。與之相左耳。其他壞亂選法。縱肆大惡。昭然在人耳目者。尚噤口不能一言。有負任使如此。臣直庸臣也。若拱者。斯可謂橫也已。夫楫乃背公死黨之人。橫臣之門生羽翼也。他日助成橫臣之勢。以至于摩天橫海而不可制。然後快其心。於此已見其端矣。臣放歸後。願令拱復還內閣。毋久專大任。以樹衆黨。使後來姦臣。欲盜威權以行已私者。不得援此爲例。上手詔令貞吉

致仕賜馳驛歸

命禮部尚書殷士儋入閣辦事

改刑部尚書葛守禮爲都察院左都御史

南京禮部右侍郎孫鋌卒

十二月虜執我叛人趙全等來獻行受俘賞

初趙全與丘富從山西妖人呂明鎮習白蓮教事覺明鎮伏誅丘富叛降虜全懼乃及其弟龍王廷輔李自馨從富降俺答駐邊外古豐州地屋居田作招集中國亡命頗雜漢夷居之衆數萬人名曰板升俺答授全等皆爲酋長丘富死全等益用事數引虜入犯破城堡殺吏卒無歲不至邊境苦之已而試百戶張彥文遊擊家丁

劉天麟明鎮子呂西川及邊民馬西川呂小老等先後降虜與全等皆居板升全等因尊俺答爲帝治城廓宮殿期日升棟會大風棟落壓殺數人俺答懼不敢復居而全等亦各建堡治第制度擬於王者署其門曰開化府有蟾宮鳳閣之號俺答亦貴近之隆慶初汾石之禍實全等本謀也時邊事孔棘中外籍籍以板升爲憂募有得全等者拜都指揮賞銀千兩久之不能得及是以把漢那吉故虜乃誘執全等至雲石堡待命總督王崇古已得請過受其獻遣使送歸那吉那吉猶戀戀不欲行崇古諭以朝廷恩意許奉表通貢不絕及宴賚甚厚那吉感泣誓不敢貳中國携其妻以歸留阿力哥及



俺答使二人爲質既得全等於是行受俘賞總督王崇古巡撫方逢時兵部尚書郭乾侍郎谷中虛主選等各陞賞有差又加恩輔臣李春芳高拱張居正殷士儋及原任大學士趙貞吉等

原任戶部尚書馬坤卒

命以部屬改科道官

收授張思忠等爲給事中戶部主事侯居艮等爲監察御史思忠宋之韓俱吏科宋應昌李貴和俱戶科程文紀大綱俱禮科蘇民牧烏昇俱兵科丁懋儒陳三謨俱刑科居艮浙江道任春元江西道周思克福建道暴孟奇河南道杜天祥山東道陳文煥山西道舒鰲陝西道

行人李采菲四川道杜化中廣東道大理寺正王元賓  
李純朴俱廣西道汪文輝張憲翔俱雲南道蘇民望馬  
三樂俱貴州道

調用江西提學副使陳萬言

科舉校士遺落者悉詣巡按劉思問求覆校幾四萬人  
思問與期會都司署中未至而士爭門入都指揮王國  
光呵止之退相蹂踐死者六十餘人南昌知縣劉紹恤  
主彌封縣有素所獎拔士試而中者二人時論俱謂紹  
恤私二人於是南科道官有言吏禮二部覆思問無罪  
國光行撫臣逮問二人中試紹恤實不私然不應招致  
門生與萬言俱以不及調用奏可

以故都督陸炳宅賜德平伯李銘。

從其請也。明年正月以十區賜慶都伯杜繼宗。十五區賜固安伯陳景行。

隆慶五年辛未春正月甲子朔。

舉計典。

賜副使勞堪江一麟等十五人各衣一襲鈔百錠與覲者宴於禮部知府徐必進等三十五人以貪酷下御史按問是年不謹內有副使顏鯨後屢經薦劾詔復其職

以歲終閱視京營將士

許百官及天下來朝官謁見中東官于文華左門

從大學士李春芳等請也

御史汪文輝疏論治體四事

皆責言官一觀望當戒二紛更當戒三苛刻當戒四護短當戒其末言大臣任已獨斷卽有關失孰從聞之臣謂宰相之職不當以救時自足當以格心爲本格心之要在去讒遠佞使賢者得行其志而已惟陛下慎簡言官申飭大臣以消朋比之私回淳厚之俗章下所司言雖不同識者趨之

勅原任操江僉都調雲南副使吳時來冠帶閒住

時都給事中韓楫劾時來不職吏部覆奏如楫言故有是命

以舉人趙蒙吉爲國子監學正

大學士貞吉弟也以祭酒姜賓時薦之乃授是職

刑科左給事中笄東光間住

先是東光以言事狂悖不爲公論所容所論亦竟罷報  
東光益怏怏遂發狂疾走入會極門大呼同官奏言東  
光疾作不能供職請回籍調理上特黜之

以籍入陸炳莊田賜皇親李鈺

田計二十二頃八十七畝

冊封皇四子翊鏐爲潞王

命大學士張居正呂調陽爲會試考官

取中鄧以讚等四百人

三月冊封王氏爲榮妃楊氏安妃趙氏和妃韓氏容妃  
定王親陞授官職例

給事韓楫言王親不任京官曾典雖有其文然已故及  
無子孫者不在禁例中請勅吏部以後陞除官員除王  
親同祖親枝儀賓郡縣主未故者宜照例不任京職其  
不係同祖與夫人以下之親及係同祖而妃與儀賓郡  
縣主已故者一體陞除京職其男爲郡縣鄉君儀賓者  
亦如之疏下吏部復請行各省撫按官查覈擢用從之  
都御史葛守禮申明巡按事宜

一正體統謂按臣不當令屬官考註藩臬二修本務謂  
肅官僚振綱紀摘奸伏理冤滯宜力舉其職諸細故毋

得侵官三愼訪察四簡受詞五完勘合六公舉劾無論  
出身惟効名實又必無俟出境以啟他議七覈查盤一  
委官無過三處八倡節儉上嘉其議令從實舉行  
廷試賜張元汴劉城鄧以瓚等進士及第出身有差  
踰月改趙用賢趙參魯吳中行等三十人爲庶吉士  
起致仕吏禮部尚書楊博高儀于家

高拱奏博可任本兵儀可任東宮輔導及實錄副總  
裁前令二臣各以原官典司前務故有是命

封虜酋俺答爲順義王

先是總督王崇古言俺答得孫後遣使來謝且乞表式  
請封且言言囊大把都來與盟疑有詐臣未之許蓋老

把都俺答親弟吉囊之子吉能等皆親弟侄而凡愼擺腰永邵卜哆囉土蠻等會又多其本統親枝也俺答於諸虜爲尊行力能合之必同心內附然後可假以王封官諸酋長比三衛示羈縻焉第俺答以爲土蠻故主也力不能致臣聞老把都與土蠻善而內親土台吉適王台吉使來臣令其約老把都以招土蠻如其來也可以破三衛交構之私卽不來則失俺把諸酋之職其勢自破孤卽今秋入寇但能螫遼左不敢南窺矣今俺答與老把都吉能永邵卜諸部各遣使十八人持番文來言諸酋感聖朝曠恩願相戒不犯邊專通貢開市以息邊民第諸邊將士習燒荒工搗巢恐妨大信願明禁約



以結盟好。惟陛下與諸臣計之耳。發譯字生一人赴臣所候。其表至譯譯之。無觸忌諱。乃取奏章下兵計言事體重大。崇古所奏獨憑一二夷使之言。未有僉同之慮。宜更會鎮巡詳議。乞封還貢。用何規制。封疆內外。用何界限。開市有先帝明禁。可復行否。卽如今議已要我不燒荒。不搗巢。他日復要我不修邊。不設備。橫索難繼之物。人心玩愒。卒有意外之虞。何以善後。務計萬全。然後請旨集議。恭候宸斷。主於邊備。宜益加謹。其搗巢捕虜。姑暫停止。以後議定。時都給事中章甫端等亦言。國家大計。講不厭詳。乞勅崇古毋徼近功。而忽遠慮。且崇古威名久著。宜加職久任。以責成功。上皆然之。

於是崇古等奏上虜酋乞封貢便宜其略言今日之事不當以馬市例論嘉靖中俺答擁衆入犯薊鎮執馬房內臣楊淮等脅以奏開馬市先帝不允而咸寧侯仇鸞將兵出塞無功懼患潛以金幣媚虜仍許請開市以逭已責當是時開市之請非虜本心故不旋踵而叛盟肆掠先帝震怒始寘于辟嚴爲之禁明旨具在臣等敢冒請以干大辟哉顧今虜情實與昔殊虜連歲入犯固多殺掠乃所亡失亦略相當又我兵出境搗巢趕馬虜亦苦之是虜固非昔之強也屬者戴天朝歸孫之恩既獻俘闕下復約其弟侄并各部落誓永不犯邊又非如昔之擁兵壓境挾我邊臣而坐索也且聞虜欲圖

瓦剌蠶食西番。慮我軍議其後。故堅意內附。以自固。其情可信。又虜使云。所請市。非復請馬市。但許貢後。容令貿易。如遼東開原。廣寧互市之規。此國制待諸夷之常典。非昔馬市比。臣等以爲。先帝在。亦必俯從。無拒也。且昨歲秋防報警。京城戒嚴。至倡爲運甓聚灰。塞門乘城之議。幾爲虜笑。今虜旣納款。開內附。乃必欲定久要。守尺寸。以幸百年之無事。異日有失。究首事之罪。是豈惟臣等不能逆觀。卽俺酋亦恐能保其身。而不能保其弟侄。能要諸酋于目前。而不能制諸酋于身後也。夫拒虜甚易。遵先帝之禁令。責虜詐之難信。而數言可決。虜必憤憤去。卽以遣降之恩。不犯宣大土疆。及三衛。必

歲糾俺酋父子爲聲援以窺薊遼則吉能子弟賓免諸酋必爲蘭靖洮河之患九邊騷動財力困竭雖智者無以善其後矣若允虜封貢各邊有數年之安則可乘時修備虜設背盟而以蓄養數年之財力從事戰守不猶愈于終歲馳騫自救不暇者哉臣等又歷稽國朝北虜舊有通貢之例如正統初年也先以尅減馬價而稱兵夷酋虜封王亦有太平賢義安樂及哈密忠順王故事故臣等酌時勢稽典制以爲許封貢便因條爲八事一議錫封號官一定貢額一議貢期一議立互市一議撫賞之費一議歸降一審經權一戒校飾疏下兵部奏請刊示廷臣會議可否請自上裁未幾都給事章甫

端張國彥給事宋應昌張思忠紀大綱各條上與崇古  
八議互有異同詔併下部議於是兵部集府部科道諸  
臣廷議之徐文壁張四維等二十二入皆以爲可許張  
溶張守直等七十人以為不可朱衡等五人以爲封貢  
便互市不便獨僉都李棠極言可許狀兵書郭乾淆于  
羣議不知所裁條爲數事以塞崇古之請大抵皆持兩  
端疏上上以爲未當令部臣更議以聞兵部奉旨再  
議請以崇古議俺答王號餘會授都督指揮千戶職銜  
今歲貢期已過二月聽于三四月一行以慰諸夷之望  
互市之時先定入市馬匹之數以杜爭端其貢使不得  
至京鐵鍋等物不得關出及他事仍執初意且言事在

邊疆之臣知之。亦惟邊疆之臣能之。今日之事。以及時  
內修爲良圖。以久任責成爲要務。人言套虜事體與宣  
大不同。宜令陝西督撫更議可否。上允行之。諭崇古  
悉心經畫。務求安妥。仍督率鎮巡官等。益嚴武備。不得  
懈弛。以致疎虞。於是封俺答爲王。崇古等人言。會議封  
貢。與原議未合者三。吉能在俺答子孫中。班行年齒旣  
尊。而不預封職之榮。入貢之賞。必發憤而爲寇。他日糾  
俺答。窺陝邊。而陝西四鎮之憂大矣。故封貢之議。吉能  
不可獨拒。一也。嘉靖初。吉囊威強。爲九邊之患。自吉囊  
死。且二十年。部落旣分。生齒日衆。而合鎮又多蓄丁壯。  
時搗其巢穴。終歲不能寧居。其所需于中國者。段布銅

釜之類。視東虜皆同。而不容互市。諸酋豈甘心是教之  
叛盟。而勒其必犯也。且鐵鍋爲虜炊爨之需。今與之衣  
而不與之器。虜衆何能自贍。或謂鍋爲兵刃所出。不可  
資虜。不知虜雖得鍋。不能鍊鐵。否則如遼東開原建寧  
以廣鍋爲市。蓋廣鍋不受炒鍊。或可倣行。此互市之議  
陝西必不可已。二也。主餉以養主兵。誠不可減。客餉專  
備。有春秋警調遣兵馬之費。今虜旣納款。則調遣可罷。  
探哨可減。其討賞濫賞。在臣等自知樽節。但守市遣使  
出入往來。非此無以示好。故臣請于客餉中。動支萬金。  
以備互市撫賞之費。或給商販。令易貨克市。以濟公私。  
此撫賞之費。必不可省。三也。軍下兵部。請行陝西總督

戴才。勘議可否。其廣銅行督撫親驗。戶部覆撫賞動支  
客餉如議。上從之。於是授酋虜昆都力哈黃台吉爲  
都督同知。賓兔台吉等千人爲指揮同知。那木兒台吉  
等十九人爲指揮僉事。打兒漢台吉等十八人爲正千  
戶。阿拜台吉等十二人爲副千戶。恰台吉等二人爲百  
戶。昆都力哈卽俺答弟把都兒也。於是諸夷解辮髮受  
封號。世世比於屬國。邇以靖安。而中國逋逃知虜不足  
賴。事急卽以之爲市。有深創矣。當是時。上告郊廟。  
昭武功。飲至。加賚帷幄。而崇古進孤卿。於是輔臣合疏。  
言頃北虜款塞。三陟晏然。邇氓釋戈而荷鋤。關城息烽  
而安枕。此自古希觀之會。而今乃有之。實我皇上聖



德誕被神武布昭之所致也。方初議時。發言盈廷。而臣等所爲仰奉。宸斷贊成大計者。其說有三焉。夫夷狄之性。譬則禽獸。適其欲則搖尾而乞憐。違其願則狂獬而反噬。爲中國計者。惟當因所利而順制之。固非可以禮義馴服。法度純約者也。嘉靖中。北虜求貢。不過貪求賞賚。與互市之利而止耳。邊吏倉卒。不知所策。當事之臣。憚於主計。却其請。而斬使者絕之。於是黠虜怨憤。擁衆大舉。或在宣大。或在山西。或在昌薊。甚哉直抵京畿。二十餘年。迄無寧日。遂使邊境之民。肝腦塗地。屯田荒蕪。鹽法阻壞。帑藏傾竭。士馬罷頓。則往歲失計之明驗也。今天佑國家。使其孫委命自至。賴朝廷處置得

宜彼遂感恩慕義稱藩請貢是天以安攘之機贊我也  
於是因而愛之不惟名順事美而可以息境土之蹂踐  
可以免生靈之荼毒可以省內帑之供億可以停士馬  
之調遣此其一也。國家時當全盛自可以警懾百蠻  
況其輸誠稽顙稱臣請貢較之往歲呼關要索有萬不  
同拒而不受不惟阻其嚮順之意又且見短示弱將謂  
我畏之而不敢臣非所以廣明主之德威於海內也  
故直受而封賜之可以示輿圖之無外可以見桀獫之  
咸賓可以全天朝之尊可以伸中華之氣即使九夷  
八蠻聞之亦可以堅其畏威歸化之心此又其一也然  
斯二者猶非要領之圖謨國者本畫之所在也虜自庚

子猖獗以來。先皇帝常切宵旰之憂下。詔修舉邊務者屢矣。然勞力費財。迄無成效者。非直當事之臣。虛文應故而然也。虜時內侵。應接不暇。卽有修爲。隨經殘破。方尺寸之未成。忽尋丈之已壞。故不能積累以日就于成。而徒費無益也。今虜旣效順。邊境無事。正國家閒暇之時。積我錢穀。修我險隘。練我甲兵。開我屯田。理我鹽法。出中國什一之富。以收胡馬之利。招中國携二之人。以散勾引之黨。卽有沉幾密畫。皆得次第行之。雖黠虜叛服靡常。必無終不渝盟之理。然有一年之日力。則有一年之成功。有兩年之時月。則有兩年之實效。得三五年寧靜。必將安頓可定。布置可周。兵食可克。根本可

固而常勝之機在我矣。如是而彼能尋盟則我仍示以羈縻之義。彼如背約卽我得遂興問罪之師。伸縮進退自有餘地。此則要領之圖。謨國者本畫之所在也。由前二說旣皆驗於行事。由後一說方取必於將來。若苟見一時寧息遂爾偷怠沿習故套搏弄虛文止圖苟免一身罔顧貽患來者則良時一過不可復得。邊備寢弛愈難振揚卒然有變將何以應。則臣等一念謀國之忠覆成他日誤國之罪。此在今日不敢不盡言者也。伏望勅下兵部嚴飭督撫將領諸臣改絃易轍具奏議處仍賜勅戒諭責其成效。每年特差才望大臣或風力科道官分投閱視。若錢糧若險隘若兵馬器械若屯田鹽

法諸事每歲拓廣整頓條實具報。著有成績者與擒斬同功。仍襲故常者與失機同罪。則邊方之實政日興中國之元氣日壯。而廟堂得坐勝之策矣。疏入。上嘉納之。亟令所司議行。因條八事。一宣府南山一帶如總督王崇古前議不必先期駐守。防秋畢日有所贏財。另項收貯。其戶部年例銀仍令歲給如故。以備緩急。一各邊城堡惟宣府稍完。大同次之。巡固甘肅則半傾矣。宣令官民隨便修築。務求堅善。一訓練兵馬大操不如小操合操不如分操。宜責之守巡兵備官。悉心考核不得徒具彌文。一工部軍器多不堪用。今議發銀聽各邊自造。請下所司詳定可否。一屯卒逃亡。苦于賦重。請令各

邊以甘肅爲例。屯地久荒者。永不起科。近荒者。十年後起科。一鹽法之弊。起于有司多派斗頭。以致官商多困。倉庾日虛。宜設法疏通。以復國初飛輓之舊。一邊軍缺馬。俱令籍數上。請以憑給發馬價。一邊民亡入虜中者。行所在多方招撫。若有沉幾密畫。不妨徑自酌處得旨。依擬仍令從實舉行。

夏四月。詔江西燒造磁器十餘萬。

工科給事中龍光等。請暫停止。以蘇民困。報聞。

都御史葛守禮疏陳官箴士節六事。

請曉諭今歲進士。使知遵守。一曰端趨向。二曰崇節儉。三曰正心術。四曰勤職業。五曰敦禮讓。六曰弘度器。

上然之一

五月叙廣西古田平寇功。

督撫李遷殷正茂總兵官俞大猷各陞賞有差。先是古田獐賊攻劫會城戕殺官民連歲苦之。其最黠者常銀豹其父朝威自弘治間與其伯朝猛占據縣治。正德中朝威伏誅銀豹挾其五子四出擄掠。至是與黃朝猛據鳳凰潮水二巢險固不可拔。至是正茂與遷謀調思明等處土兵及漢兵共十萬令大猷統之直抵諸巢合營進剿。凡斬首七千四百六十餘級俘獲男女一千三十餘人撫其不爲寇者六百六十餘所。正茂之功居多。捷聞上嘉三臣首功乃有是命。其諸有功當錄者命巡

按御史勘聞於是遷正茂等條上善後事宜。一設兵衛  
叅將各一員彈壓其地。一設千戶二員百戶四員旗操  
軍四百人以嚴隄衛。一龍門隘都狼隘牛河三阨宜樹  
柵立堡立管防守。一芟伐林箐夷其險阻每二十里建  
一遞鋪以徇民克之。一古田旣改爲州夫馬廩給請以  
桂林所屬柳浦建安橫塘等驛分撥。一版圖旣復宜分  
里隸各鎮殲絕各徃遺田候踏勘處分其復業聽撫徃  
民編立里保糧則從輕并禁州官科擾故累。一布政司  
貯軍需宜時加稽覈專倚古田無得那借戶兵二部覆  
奏。上皆從之。然是時銀豹實未死祇以窮蹙陰令其  
黨覓肖已者斬首以獻。主簿廖元把總王綱相與証之



已捷聞矣。其後稍稍傳不死狀。正茂令僉事金柱踪跡之銀豹兄銀站。乃生縛銀豹致之麾下。至六月。正茂具疏其狀。且引罪。械銀豹赴闕下。得旨。械豹令正法。命御史治元等罪。并覆柱等功狀。以聞。遷寵等勿問。九月。磔銀豹。并斬其孫扶。獐于西市。傳首夷方。授陝西舉人呂潛爲國子監學正。

以撫按官張祉等交薦其孝廉故也。

御史陳文煥請勅督學諸臣兼詢德行。上是之。工給事張博請改瓜洲土壩爲閘。以便漕舟從之。少師大學士李春芳致仕。

疏凡五上。上察其誠懇。優詔褒美。賜馳驛。遣行人曹

誅護行仍月給廩歲給夫

革漢陽知府孫克弘職

克弘者前大學士徐階同邑人也遣其家人孫伍至京師或妄傳爲階所使給事韓楫朱之韓計欲尋端批根以中階伍寄宿民家兩人奄至其卧內襲執之大索資裝求階事爲左驗而伍所持獨克弘所與親故書他無所獲乃更引他事謂階子璫等侵盜本府起解錢糧各坐以不法并盡捕階家人畱住京師者雜考治之御史王元賓受楫等指窮竟其事執伍等送法司因奏克弘負緣陞遷當罷狀并極言詆階克弘坐斥於是喜事干進之徒益務踪跡階事爲奇貨矣

六月原任吏部左侍郎靳學顏卒。

濟寧州人爲人淳謹內行修潔文學氣節俱爲士論所重以三品未考滿賜祭一壇給半塋。

給事周芸御史李純朴爲張昉訟寃。

并諭都御史王廷刑部尚書毛愷等。阿黨肆意比附成獄請法司更訊亟爲昭雪已而刑部尚書劉自強覆奏齊所坐絕無事實廷愷曲法徇私如芸等言得旨齊准昭雪叙用廷削籍爲民愷追奪原職乃補齊通州判官。考選庶吉士趙用賢等。同修撰張元朴等俱送翰林院讀書。

嘉靖丙戌後進士及第者不復入館肄業至是始復故。

事云

定官生除授陞遷例

吏部言官生任宗人五府率多出爲雲貴知府不旋踵輒罷去若謂此輩不足用姑如是處之云爾是人與地皆不得其宜也按部署等官年資深者始得爲知府官生旣可爲知府則亦可爲部署等官乞自今官生出身六七品以上者得陞部署及京府治中太僕寺丞等官如果稱職則遍遷之至於遠方知府尤當與內地一體除授陞遷不得低昂從之

禮部請議定宗藩事宜

覆河南撫按栗永祿楊家相禮給事張國彥等奏也天

略言歷考前代未嘗有宗室而坐食縣官者。我聖祖獨厚宗親。世授爵祿。恩至渥也。然聖祖當天潢發源之始。故奉以數郡而易供。今日當宗支極茂之時。則竭天下之財而難給。以天下通論之。國初親郡王將軍纔四十九位。今則玉牒內見存者。其二萬八千九百二十四位。歲支祿糧八百七千萬石有奇。郡縣主君及儀賓不與焉。是較之國初數百倍矣。天下歲貢京師者。止四百萬石。而宗室祿糧不啻倍之。然特論平時耳。萬一遇水旱凶荒。征輸無出。將何以處之。又特論目前耳。將來傳世萬億。生齒無算。又何以處之。今上下公私兩受其困。良以恩施寡節而供輸之策窮。禁縛太嚴而資生之

路絕今日之勢。有不容不變通者。且祖廟之制。親盡則祧而襲封之典。曾不少變。是待祖宗者薄。而待子孫者厚。恩禮不幾于倒施乎。今之論者。動曰。祖制不敢輕議。然觀洪武初。親王祿米五萬石。不數年後。以供給難繼。減至萬石。其後待慶遼肅谷諸王。俱歲給五百石。是高皇帝制祿已無定矣。永樂間。秦魯唐府各五千石。遼韓伊府各二千石。肅府僅七百。慶府雖七百五十石。而郡王常于數內撥給。是文皇帝頒祿已變更矣。爲今日計。國家財力無措。則不得不限服制以殺其祿。給祿既減。則不得不聽自便。以開其生路。生路既開。則不得不嚴法制以禁其爲非。蓋審時酌變。爲國家

經久之圖莫有過于此者。伏望 皇上諮求長策。容本部以先後諸臣條議通限各王府一併議覆。如違限者治輔導官罪。候各王府議至之日。本部卽請大集廷議。恭候 聖明獨斷。以成一代章程。以定萬世法守。上報可。

大學士高拱請以舉人才德出衆者。宜與進士一體陞取。又請以行太僕苑馬寺運司官與布按司一體陞遷。俱從之。

給事中胡價等勘視膠萊河議。詔寢其事。

價言。今爲新河之議者。徒指元人故渠及副使王獻臆說。非能涉二百餘里。親觀其利害也。臣嘗濬分水嶺。險

問獻所鑿渠皆流沙害朋雖有白河一道徒涓涓細流  
不足灌注至如現河小膠河張魯河九穴都泊稍有潢  
汙亦不深廣膠河雖有微源然地勢東下不能北引且  
陳封閘以下夏秋雨聚衝流積沙爲河大害縱爲諸水  
可引亦安能以數寸之流濟河之用則諸河之不足用  
明矣或謂新河頗多積水可因用爲渠不知潢潦所聚  
皆以下流壅滯之故設皆濬深水必盡洩則蓄水之不  
足恃明矣或欲引濰河之水不知濰河在高密西去新  
河一百二十餘里中間高嶺甚多雖竭才力終不可濬  
則濰河之不可引明矣分水嶺以南至陳家閘以北至  
周家莊雖云近海通潮又皆岡石縻沙終難鑿治則海



水之不可達明矣。大抵上源則水泉枯涸無可仰給。下流則浮沙易潰不能持久。二者皆治河之大患也。故元史食貨志以爲勞費而無成。國初徧訪運道。舍此而不顧。自獻以後。屢勘而不行。良由于此。臣請亟罷其事。并令所司明示新河必不可成。勿使今之既誤而復誤後人也。上乃罷。令自今不必更議以滋紛擾。

按山東平度州東南境有南北新河。元時所開以避漕運放洋之險。其水源發高密至膠州。分流爲南北新河。自膠州入新河二百四十里至萊州之海。倉口入海。自迤北新河店置閘以達安東。止八十里可通海。歲久盡塞。近王副使獻方。御史逮宜力主開復。并於馬家灣鑿

山麓通海近該巡按山東御史商爲正題會同都御史  
李世達勘議欲從元人故河引泉瀦水運漕間道但南  
海田海口至店口三十餘里多沙自麻灣以上係估河  
流沙與沙互壅麻灣以下則金海中隨潮轉運至壩每  
糧百石給水脚銀二兩九錢其輕齎銀先期委官由陸  
路解赴督糧官收用一議回貨言海運冒險旗軍完糧  
回南每船許帶私貨八十擔給票免稅以示優卹一崇  
祀典言山川河瀆祀典具載今海運所畏者蛟與風耳  
宜舉廟祀以妥神明疏下部覆如議于是海運行而議  
者籍籍非刺之會再運三百艘中七艘壞而罷夫禹貢  
刊滌功止達九河幾蕃荒服惟薄海則海固古聖帝明

王之所不能用也。元史具備海運所失陷之數，詳矣。風濤不測，洋舟漂沒，亦云歲有計一舟所失米，不過千百石而從溺者，率不下數十百人。歲以數百十人之生，成與漕數較多寡，而以為便憂人之君相，殆難言之矣。又廢棄百年，事未習而難安，顧燕為皇都，獨議漕。國家歲漕四百萬石，為京師命，而經絡中國二千餘里之水，以為漕，則漕其官員也。買官喉嚨曰：古之治河者，順其性，抑使無為害而止矣。今不惟去其害，而且欲資其利，不惟不敢導之北，顧方策堤捲埽，歲費以億計。防河北，徒如防寇，我然計獨在保漕。馬中丞卿有言：京師脫六月無漕者，困矣。何暇及遠？盍姑為紓目前計乎？

蓋其慮也

尚寶卿劉奮庸疏條五事

一曰保安 聖躬二曰總攬大權三曰慎乃儉德四曰  
留心章奏五曰起用忠直按奮庸疏詞有所指斥頗中  
時宜阿意者以爲久不徙官有怏怏心更相與詆訾之  
安慶官軍亂詔械指揮張志學等至京鞠治

刑部問遣至是疏乞嚴禁 上深然之令廠衛五城訪  
捕都察院仍揭榜禁約

吏部議定徵賦不及數降格

以見年爲正徵當年卽完以前負爲帶徵陸續補足總  
計分數議降一級仍在地方視事俟完足之日始復原

官復官之日始計俸考職行取陞遷若地方凋敝殊甚  
許撫按覈實定限從容徵補如資俸已深限期未滿而  
額有半完者亦得陞取

許吉能同俺答入貢

總督陝西都御史戴才因上互市事宜一改延綏市厥  
于紅山邊牆關門之外修復寧夏清水營舊廠開市之  
日列卒守之以防不虞一發延寧二鎮椿棚地畝等銀  
大小二池鹽課銀一萬兩及陝西鎮椿棚馬價銀五千  
兩收買貨物待虜入市一發太僕寺馬價銀二萬兩輸  
之延寧買馬 上皆從之

九月山東守臣言安集遼人之議有八

青登萊三府海島潛住遼人遼東每年勾攝既不可得而山東虛文羈縻終非永圖八議一定分管青州諸城縣分管齊堂島萊州府膠州分管靈山島行棧島卽墨縣分管福山島大管島小管島田橫島掖縣分管芙蓉島登州府文登縣分管劉公島寧海州分管崆峒島青島宮家島蓬萊縣分管沙門島長山島大竹島鼉磯島墨山島小岬島黃縣分管桑門島三府共二十島遼人附居者皆籍而撫之二嚴保甲保長朔望諸州縣受事歲報戶口之數三收地租各島見耕地八千三百八十六畝宜比寄庄事例畝量稅銀五釐以備巡察海道倘倭都司修船之用四查船隻各島遼人漁販船隻小則

稅銀一錢大則一錢二分。各輸州縣以備修船。敢有擅用雙桅遠泛海洋或近高麗者罪無赦。五平貿易。遠人既爲編氓宜與土人均平交易。不許入夜私交以生他累。亦不許貨違禁物。六專責成。安緝撫綏當責成海道及都司。乃可統紀。七修哨船。海禁日弛。乞令將所造海鵬船十艘。遼船八艘及時修理。八杜竊逃。各島安插既定。遼人避事。亦有竊逃者。宜令遼鎮重禁。今州等處人毋復越海。上從之。

巡撫大同劉應箕疏請申職掌

上命兵部尚書楊博等再議曰。總兵以鎮守爲名。是古專閫之任。巡撫以贊理爲義。亦曰監軍之職。故職任不

分則尸祝無代庖之理職任太分又恐非同舟共濟之義今應算止以近年賞罰不當爲巡按各州縣勘功官所持故設此論以自別于將官不知各處巡撫亦請有旗牌設有標兵儼然以將官自處及至有事乃欲自異得乎今斟酌所議自後沿邊江海鎮巡官宜令各遵勅書行事遇有地方功罪通查職掌一體酌量論賞行罰其總兵官臨陣有功則叙功在巡撫之上若退縮債事虛冒錢糧罪坐總兵而不及巡撫巡撫調度失策及臨警坐視不共替襄亦當從總兵之罰今後巡按叅劾視失事大小爲差不得槩及鎮巡勘事官今隔別差委上從之



詔以故禮部左侍郎薛瑄從祀孔子廟廷。

其神主序于先儒呂祖謙之下。

詔焚毀陳建所輯資治通紀。

從給事中李貴和言也。

總督王崇古報北虜互市事竣。

崇古巡撫劉應箕楊綵孟重總兵馬芳趙苛麻錦等陞賞有差。

十月吏部左侍郎張四維再疏求去許之。

十一月以陝西貢市事竣賞虜酋百能等有差。

效勞總督戴才巡撫邵光先張蕙總兵雷龍謝朝恩等各賞銀幣有差。

大學士殷士儋致仕

先是御史趙應龍言其因太監陳宏夤緣入閣未幾御史侯居良復論其始進不正求退不勇于是士儋請益力上慰留至再及是始允賜路費銀鈔幣馳驛歸廩夫歲給如例

詔原任湖廣副使徐學謨以原職叙用

學謨前爲巡按雷稽古劾罷至是撫按汪道昆等言學謨事皆風聞無實不當罪故有是命

十二月宣大總督王崇古條陳邊計八事

一修險隘一練兵馬一收胡馬擬春首發宣大山西各馬價萬兩聽軍前易馬一散逆黨謂款虜數萬仰食板

升收穫若招徠大速恐故戎心宜用間緩圖一積錢糧  
謂宜俟一二年後虜果無警方可漸損客餉以給主兵  
一理鹽法謂邊商報中日寡由大商占引抑困之故宜  
責各運司嚴法禁治一開屯田謂宜移山西屯田僉事  
于代州專理三關及大同鎮屯務一整器械謂禦虜之  
器獨湧珠大砲最能及遠乞發工部銀萬二千兩分給  
各鎮增置疏下所司議俱從之

御史劉良弼以封貢事畢陳六漸

一曰封疆弛守之漸二曰熟夷疑叛之漸三曰將領推  
諉之漸四曰塞下虛耗之漸五曰勇士散逸之漸六曰  
市地增加之漸

廣酋寇遼東。總兵李成梁等帥師禦之于卓山等處大破之。

斬首五百八十餘級。內酋首二人。獲馬六百餘匹。甲二百餘副。其他夷器亡算。成梁及總督劉應節巡撫張學顏副總兵趙完等各陞賞有差。

罷總理河道都御史潘季馴。原任漕運都御史陳炯俱冠帶間住。

時給事中雒遵自邳河勘工還。上言運船漂沒之故。始于漕司缺船。併糧太重。故一遇水發。相繼而敗。又官旗侵冒者多。度不能償。輒妄引船壞自解。此則漕臣陳炯等之罪也。至于王家口初決之時。黃水盡從漫坡經流。

南出小河口，藉令季馴稍緩築隄一月，則漕船可以盡出漫坡，避新溜之險，乃計不出此，反驅舟以從新溜，坐視陷沒，方且騰章報功，罪滋大矣。工部覆如其言，故有是命。

隆慶六年壬申春正月戊午朔

詔雲南廣東採辦珠寶

歲進寶石二萬塊，珠八千兩，三年而止。科道張書劉世曾疏請節省報聞。

命工部尚書朱衡兼副都御史經理河工，從雒遵薦也。

命叅政潘允端移駐淮安專理漕務。

從都御史王宗沐奏而設也因革漕運協同叅將

戶部尚書張守直條列漕政事宜。

一申嚴議例如糧船到淮後其責在各處巡撫已到淮而更遲誤責在漕司一查處糧船各總淺船已回水次者責令委官嚴修及行各把總暨桅量派毋令重載易壞其守凍未回者另覓民船裝糧抵壩候凍船回日修理仍將委官查究一查刷船軍諸殷壯戶丁照額僉運不許募無賴代克仍五船編甲互相覺察一議處漂流務將官旗盡家抵償沿途有司不得妄行勘奏其撈獲餘米監收官別貯先支得旨如議行

罷山西右叅政孫枝左叅議查鐸開任

時萬壽聖節二臣不肯入賀爲巡撫楊綵所劾故黜之。

禮部尚書潘晟覆科道官張國彥等疏陳輔導東官事

且

言獻議雖殊大意有十曰慎選官僚曰久任輔導曰精擇近侍曰親近師友曰內崇孝敬曰外敦齒讓曰仁體天地曰儉法祖宗曰欽崇正訓曰躬垂聖教官僚在閣臣吏部遴選得人上請久任左右近侍在司禮監審擇質疑問難親接儒臣一切孝敬仁儉有關儲教者在皇太子遵修古誼以光睿德至于燕閒之際質問所業時加訓迪則惟皇上加意議上報可

二月初置新寧州。

屬廣西南寧府。從殷正茂奏也。

令廣東舉劾另立科條。

從吏部言有弭盜安民循良著績者不拘多寡盡登薦剡本部更加諮訪亦不拘行取超擢他省不得援例從之。

甲午。皇太子行冠禮。

浙江巡按謝廷傑請罷客兵以恤疲困練主兵以濟實用從之。

起吏部侍郎張四維協理詹事府事。

選東宮輔導官僚。



閏二月虜酋黃台吉掠車夷革固等帳房

革固者不知始所從來嘉靖間始流住宣府邊外與史夷雜處遂因撫之以爲外藩然非故屬夷亦徃徃爲台吉所掠至是撫臣吳兌奏曰已使人詰問黃酋令其遣還但與史夷勢同唇齒請于近邊閒曠之處另築小堡二三以安挿史夷俾頓老小其壯丁悉聽近邊住牧是東路又設重險以夷禦夷一利也潛消虜謀二利也另堡安挿免夷漢錯居三利也築堡規制止可安挿老小家財其壯丁帳房環列堡外平時附近牧放有警登堡防禦每堡選撫夷官一員率通夜人等爲之稽防奸僞啟閉堡門既預弭其跋扈之謀又羈縻其飛揚之志四

利也。巡按御史劉良弼亦言車夷與史夷自相依附而中國視二夷以爲外藩。車夷旣去則史夷之勢自孤。恐難存立。史夷再去則北路之藩籬盡撤。益難隄防。中國制馭不可不謹。事下兵部。乞命總督等官遣使詰問。真實責令遣還。如占愴不發。先革車夷撫賞。并酌處機宜。上是其議。

三月始定捕盜條格

時盜劫安義縣庫。知縣曾知經爲民署分守方良曙降俸一級。

戊子皇太子出閣講書。

黜南京管倉主事張振選閒住。因禁外屬抗違上官。

南京戶部尚書曹邦輔奏其違抗不職吏部覆言。往歲  
執政之臣悅人媚已。故愾夫之在庶寮者。託爲與援。以  
語言相構。肆意排陷。于是堂官不敢行其約束。而屬官  
益敢恣其胸臆。卽未必有與援者。亦皆以爲拘爲風采。  
而安意承行者。蓋鮮矣。其外省則由巡按御史。往往以  
進士推官知縣。有科道之望。乃曲爲護庇。引爲私人。陰  
授以廉訪之柄。凡二司賢否。悉出唇吻。于是二司反皆  
畏懼。曲意結納。請通行內外諸司。今後屬官敢有抗違  
上官者。俱如振選例。上官不能督率。有罪不行糾治者。  
以不職論。巡按有護庇。引爲私人者。聽部院科道參奏。  
上報可。

禮部尚書潘晟乞致仕許之。

先是給事朱之韓論晟衰朽不堪典禮上慰留之之韓嫉同官賈待問臣鐸等攻之晟三疏求去乃得許按之韓淺鄙狠愎內諂附當事以自肥利而外務搏擊以必勝立威不獨攻晟一事士大夫多側目視之。

總督漕運都御史王宗沐上海運議。

其略曰唐人都秦右據岷涼左通河渭是險可依而水未通利也有險則天寶興元乘其便無水則會昌大中受其貧宋人都梁背負大河面接淮汴是水通利無險可依也有水則景德元祐享其安無險則宣和靖康受其病若國家都燕有居庸醫巫閭以爲城而南通大

海以爲池。金湯之固。天造地設。以拱衛神京。而海道不通。是太平之遺慮也。此天下大勢也。夫三門天下之險也。唐人裴耀卿。劉晏輩。百計經營之。不廢者。都關中故也。若都燕。則旣受河與海矢。河一自安山。涉汶濟。卽今之會通河。一自溫入汴入衛。而俱會于天津。然終元之世。未嘗事河而專海者。彼以陋夷紛攘。終歲用兵。固無暇于河也。彼又以爲河亦有不如海利者。入閘則兩舟難並。是不可速也。魚貫逆遡。一舟壞則連觸數十舟俱壞。是不可避也。一夫大呼。萬櫓皆停。腰脊咽喉之臂。先臣丘濬言之。是不可忽也。若主于河而協以海。自可萬無慮。故都燕之受海。猶憑左臂。從腋下而取物也。不可

棄也。此都燕專勢也。黃河西來。禹故道雖不可考。然不過自三門而東出天津。入于海。是腹雖稍南。而首尾則東西相衡而歸諸北也。乃今則直南入淮。而去歲決從閻家口出。支河近符離靈璧。又幾于正南。支河自西北而抵東南。其爲途益遠。而合諸水益多。如去年之漂流中外。大小臣工聞之。有不變色者乎。夫旣不能不變色。于河之梗而又不能無難色。于河之通則計將安出。此目前急勢。三也。風波天數。臣亦何能逆覩。其必無然以爲趨避占候。使其不爽。當不足以妨大計。且語有之曰。天不滿西北。地不滿東南。東南之海。天下之水之委也。渤澥稽天。則迴避靡地。近南水暖。則蛟龍窟居。元海運。

之有敗以其起太倉嘉定通而北也。若自淮安而東由登萊泊天津則原名北海中多島嶼可以避風。又其地高而多石蛟龍有往來而無窟宅卽以舟與米行於其間因其曠遠以取速而標記島嶼以避患。名雖同於元人利實專其便易。佐河運之缺計無便于此者。因條上海運七事。一定運米請將淮揚二府兌改正糧二十萬一千一百五十石盡派海運遇有災傷改折以鳳陽糧米足之。一議船料通計船四百二十六艘宜酌派湖廣儀真各廠置造合用料價十一萬八千四百兩卽將清江浙江下江三廠河船料價併折糧減存班匠等銀解用。一議官軍宜分派淮大台溫等十四衛責令撥軍領

駕每艘以九人赴運以三人扣銀添領水手。設海運把總一員統之領幫官員于沿海衛所選補。一議防範責令巡海司官等官定派土島小船置備兵仗以防盜賊。一議起剝天津海口水淺舟膠用剝船湧進渾沙勢俱難取。欲由把浪廟地名路溝另開二渠至鴨港繞避麻灣十三里之沙。由鴨綠港迤南尚有沙洲見露水中卽空舟尚不能行。況古路溝未挑通地脉相似。安知下無沙。安保他日海沙之不湧入。北海海倉口龍王廟前沙數十里許。用徒夫及昌邑夫三千餘人撈二十餘日。給過工食二千二百兩去沙僅二尺。路止二里沙堆積岸上。大潮一至沙壅如故。且復議築堤約水障沙。不知海



口之堤用土則勢不能當用石則費不可計。分水嶺自嘉靖十七年十八年二十二年三十二年隆慶五年節次勘測皆高海面五丈以上。上接白河流沙。先年明給事中謂流來之沙旋挑旋壅。況沙中乃有石沙。見水則可搏濕泥帶水卽成稀泥軟土。故役人言地底有泉。泉內有沙。工方難施。夫海口之沙旣欲避而不可得。海之潮又勢遠而不能通。縱欲引附近張魯河白河膠河都泊諸水以益之。而春夏旱乾俱各微細。旣不足恃。秋澇沙壅輒復爲患。徒費挑濬。奏聞報罷。

秋七月。令教職與雜流官得于近地銓補。

賜故少詹事黃佐諡文裕。

以廣東撫按李遷趙焯言其志行端毅學問宏深故也  
八月旌表順天府列婦張氏

生員翟思榮妻也夫亡絕粒者二十一日卒科道請表  
揚之

令緝拿指稱吏部駑騙者

先是王三聘輩假稱高拱外甥表侄騙財有証拱自訪  
獲遂志學與知府查志隆有怨至是以支放軍糧事愈  
恨之遂與指揮馬負圖張承祖率舍餘馬應舉等及家  
奴屯卒四百餘人閉城大譟圍府舍欲殺志隆守備楊  
遇春不爲禁洶洶三日乃稍解南兵部尚書王之誥等  
奏聞乃遣官校逮志學等而赦屯軍脅從者已而南守

備太監張宏言志隆稽誤月糧激變軍士又擅離職守潛入南京亦乞速究以彰國法乃併逮志隆于京師訊之

戶科給事中曹大埜論大學士高拱大不忠十事

前聖體違和拱言笑自若且過姻家曹金飲酒作樂一也東宮出閣講讀拱止欲三八月叩頭而出是敢于自尊無臣人之禮二也自拱復用昔日直言拱罪如岑用賓等降黜殆盡善類一空三也副使曹金其子女親家也無一才能乃超陞至刑部侍郎給事中韓楫其親愛門生也歷俸未久以承指而超爲右通政四也科道乃陛下耳目拱每當選授卽于部堂戒諭不許擅言

大臣過失五也。結言官爲心腹。凡陛下微有取用。交章上奏。至拱罪惡。皆隱諱不言。六也。久掌吏部。凡黜陟去留。不恤清議。蓋權之重過于嵩。而其引用匪人。排斥善類。大甚于嵩。七也。副使董文采。餽以六百元。卽陞爲河南叅政。吏侍張四維。餽以八百金。卽取爲東宮侍班。因權納賄。賍迹大露。八也。原任經歷沈鍊。論劾嚴嵩。謫發保安。楊順路楷受指。何意誣鍊勾虜。無辜見殺。比順楷論死。天下稱快。拱乃受楷千金。強辯脫死。衆皆不平。九也。操江吳時來。在先朝抗疏論嵩。所謂忠臣也。拱以私恨。借一小事黜之。大學士徐階受先帝顧命。古所謂元老也。拱以私恨。乃多方害之。必欲寘之死地。

至于太監陳洪之間住出自宸斷拱與洪密嘗諷令言官欲爲報復俺答歸順惟聖威所致拱乃揚言于入而歸功于已十也疏入上責大桄妄言命調外任按大桄所論內亦有中拱之病者然是時疑者謂出張居正意而受曾省吾指故不數年而大桄爲巡撫居正死而大桄遂罷去

九卿諸大臣科道等官俱上疏請留大學士高拱

時拱辯且辭上已慰諭褒美未嘗聽拱去而諸臣連章保留識者以爲諂云

夏四月降尚寶寺卿劉奮勇爲興國知州

奮勇自建言後衆排端尋之謂其怨望高拱言有譏刺

及大埜疏出。皆指目爲邪黨。給事徐夢桂乃極詆奮。勇而程文又盛頌高拱。摘大埜疏。一一辯折之。得旨奮勇降。調大埜爲乾州判官。時識者謂夢桂等朋比卑諂。公犯名義云。

應天府丞丘有崑革職爲民

巡按御史姚光泮劾奏原任編修曹大章原任苑馬卿韓子允詐取平民財物萬餘有崑亦入其重賄。賍迹頗著。吏部請罷有崑。其大章子允行南京法司逮問。具奏從之。

詔准魏國公徐鵬舉庶子邦瑞襲爵

命禮部尚書高儀兼文淵閣大學士入閣辦事

詔復故總督兵部尚書胡宗憲職

給事中劉伯燮言故總督曾銑胡宗憲皆立功之臣竟以罪死臣甚惜之銑規復河套任事過勇而謀涉疎宗憲依附權勢靡費軍餉與夫殺戮過慘不能無罪然當倭奴憑陵之際卒以計擒首惡海波遂寧此其功罪亦當相準銑既蒙贈蔭而宗憲未獲昭雪何以爲邊臣勸宜加卹錄故有是命

命逮問杭州衛千戶陳鎮等如律

檢討沈位以奉使冊封并過睢寧與鎮等爭道鎮等率諸漕卒毆位死僨運御史張憲翔以聞給事馮時雨等亦乞盡法以銷亂萌故命巡按及僨運御史逮問如

律

五月工部尚書朱衡會議瓜洲建閘事宜有五便詔從之

復廣西全州灌陽縣編戶

國初編戶十四里以徭寇殘破居民流徙田多荒蕪僅存八里又調他衛軍屯守許自占田墾種田租歸軍衛者十六七民籍日減僅存六里至是撫臣郭應聘以占田賊平清丈田畝請以軍餘承種民田者皆入有司以復十四里之額從之

總督王崇古爲虜酋俺答陳乞四事

其一請給王印如先朝封忠順王例其二許請貢使



入京比于三衛。每會貢使二人。總督大會四人。俺答十人。總六十人。貢馬三十匹。其二請給鐵鍋。議廣鍋十斤。煉鐵五斤。尚未可爲兵器。路鍋生粗。每十斤煉鐵三斤。宜可給與。令其以壞易新。其四請撫賞。虜中親屬布段米豆。散所部窮夷塞上。仍許不時小市。疏入。兵科梁問孟以爲。鍋可互市。撫賞不宜輕許。禮科陸樹德言。貢使入京有五不可。凌虐驛使一也。忿爭起釁二也。京師之內。館穀闊略。虜如不逞。損威傷重三也。窺伺動靜四也。年來雖少。後必漸多。如水穿寶勢難卽塞五也。宜如近事。代爲之進便。吏科雒遵等亦皆言不可許。兵部因會戶禮部議。乃言順義王印。如崇古議鑄給。凡表章俱令

印進其貢使入京。僉謂不可。第故事夷人入京必欽賜筵宴。簡命勳臣以待。且厚其賞。今順義王使至。邊宜遣光祿署丞齎賞物。就給令本鎮具欵。賜筵宴。總兵待之如禮。其議廣潞二銅均犯出塞之禁。無已。則以銅鍋代之。宜令總督市給其虜酋親屬。及窮虜之賞。不可以久。宜令總督審畫一之法。勿靳勿濫。如各鎮原議。上從之。

賜虜酋俺答順義王鍍金銀印

已酉 上疾大漸。召大學士高拱、張居正、高儀至乾清宮受顧命。

是時 上疾已急。口雖不能言。而熟視諸臣。領之屬託

甚至蓋自 孝廟顧託三臣之後僅再見也

庚戌 上崩于乾清宮

翌日發喪頒遺詔

七月丙戌上尊諡曰契天隆道淵懿寬仁顯文光武純德  
弘孝莊皇帝廟號 穆宗

九月壬寅葬 昭陵

上天資純粹寬仁大度改元以來黜不經之祀罷無用  
之作蠲非藝之征絕無名之獻除煩節冗恤困疏冤獎  
遺逸汰儉邪供膳減省掖庭嚴肅近侍有犯盡法無貸  
言官觸怒終蒙釋遣舉大閱之禮以討軍實申失律之  
誅以正戎章是以窮廬大漠之長貢布不絕蕭峒馮林

之孽。傳車自詣。雖言者數請修御便殿。召對故事。皆大  
之許。然端凝厚重。不殺自威。優崇輔弼。羣力畢收。守  
祖宗之法。無紛更約束之煩。先儲貳之教。爲長久治安  
之計。蓋清淨化民。庶幾漢帝寬仁馭下。比迹宋宗。雖享  
國六年。而貽謀弘遠矣。